


# BUPIKUDI KU BUKOLÈ

 Twasàkidilaayi, wa manza tètè. Dilòòlò dilenga, nwènu balundà bàanyi. Ndyèsè bwà kwikala kaaba aka dilòòlò edi, bwà kwakula neenù cyàkàbìdì mu Dìna dyà Mukalenge wetù munanga Yesù Kilistò. Ne bitu misangu yònsò ànu dyèsè dyà kutwilangana ne cisàmbà cyà Nzambi, mwaba kanà wònsò, ne bwà kwakula bwà Dìna dinène adi, Yesù.

<sup>2</sup> Ndi ngányisha bushùwà musambu ùdì mwanèètù wa balùme ewu ùfùma ku dimba. Awu, awu's ke wànyì ùntù mutàmbe kunanga. Mu ditùkù edi dìdìbo bàteeta bwà kuvwija Yesù ànu mupròfetà patupù, anyì muntu mwìmpè, anyì mulongeshi, cidi cyà bushùwà cipàtula Bunzambi Bwèndè, civwàYe aci. Ne ndi ngùtabuuja ne Yèyè ùvwa . . .

<sup>3</sup> Kacya kakùvwakù Kampànda bu Yèyè to, pa buloba, kàadyàkwikalakù to. Yèyè ùvwa Èmanùwèlè. Yèyè ùvwa Alpha, Omega; cibangidilu ne ndekeelu; Ewu wàkadikù, udikù awu, ne wàlwa awu; Muji ne Mùtòlokù wà Davidi; Mùtootò wà mu Dindà. Munda Mwèndè mùvwa musòmbèle Bunzambi. Munda Mwèndè mùvwa Nzambi.

<sup>4</sup> “Nzambi ùvwa mu Mwàn'Èndè, mu Kilistò, ùpungisha bàà pa buloba ne Yèyè mwinè.” Yesù wàkamba ne: “Kí m'Mémè udi wenza byenzedi to, kàdì n'Taatù Wanyì udi musòmbèle munda Mwànyì. Mémè ne Taatù Wanyì tudi umwe,” Nzambi mudimwènèshe, mu mubidi. Ndibuulula kaayi bulengadi dyà dinanga dyà Nzambi kutùdì, Yèyè ùvwa mwà kuDikùtulula ne kupweka bwà kusòmba mu mubidi wà buntu, bwà kuumusha mpèkaatù ne bubèèdì mu bukwàbantu, ne kutùpikula kutwàluja kùdì Taatù. Abi's mbilenga byà dikèma, kí mmwòmò anyi? Ncyà bushùwà ne tudi twanyisha aci.

<sup>5</sup> Mpindyewu, makèèlèlè dilòòlò, ngèèla meeji ne nebikengelè bwà mémè kulòmba luse. Ndi. . . Billy mmungangàte, ne lùkàsàlùkàsà ndambù, makèèlèlè dilòòlò awu, bwalu civwa bu. . . Mwva mupùngile. Kàdì masangisha awu, dijingulula dyà meeji adi, nènku muntu nànsha umwe kàakumanyakù ne civwa neinyì to, amba ànu ciikàle. . . Bikèngela nùbwelàmu, bwà kucìmanya, nwamònu's. Kakwènakù mùshindù wà kuteeta kucyùmvwija to. Kakwènakù mù—mùshindù wà wèwè kucyènza to. Cidi ànu dilabula dìdì—dìdì muntu nànsha umwe kàyì mumanyè bwalu bwàdì to, ànu aba bàdì bàpicilamù abu. Cididi dyènzela bukwàbantu, cididi dyènzela muntu, dipàtula mwoyi mwena dìinà munda mwèndè!

<sup>6</sup> Èè, wèwè's udi ne mwoyi mu bipaapu bìbìdì. Wèwè udi mu *eci* cipaapu, ne udi mu *cyàcya* cipaapu, paùdì ne muntu mukwàbò, pàmwàpa kùkaadi bidimu makùmi àtaanu; nènku

udi mwà kwikala ne muntu kampànda, mu bidimu bicilwalwà, kuumukila ku leelù ewu; kàdi nànsha nànkù udi ufika ku dyumvwa ne udi mwimàne pa cibùmbà cyà ku cyambilu apa, ne mwikàle munkaci mwà kwakula cintu kampànda cìvwà cyenzèke kùkaadi bidimu, bidimu byàbùngi; pàmwàpa kùkaadi mbingu, anyi ngondo; mu dikwàbò ditunga, mwaba mukwàbò, anyi cintu kampànda. Nènku dîbà adi udi uteeta kudilama mululàme, mu cyôci aci, ne wela meeji; ndi nkwambila ne, ncintu's. Kàdi too ne mpidyewu Mukalenge mmutùbènèshe, mu cyôci aci, nènku tudi ne disànkà dyàbùngi, ne tweyemena mpidyewu ne Nzambi neàngate butùmbi ku disangisha edi.

<sup>7</sup> Mpidyewu, mu—mu masangisha à dilòlò edi, mvwa ndyàmbidila, patùcidi ànu dyanza dikesè dyà bantu apa, pàmwè; masangisha ètù mmamanyishùbwe ànu munwemu emu, ne miinè awu àdi ànu bwà bantu bàà munwemu. Ne kumpàla kwà twètù kubwela mu citùpà cyalàbàle cyà masangisha, Mvwa munkaci mwà kwela meeji, leelù ewu, ne mvwa mufwànyine kuteeta pàngà apa kwangata dìmwe dyà ku malongesha makùlùkùlù, kudipàtula mu Bible, kudifila kùdi bantu; bwà ne dîbà dyàlwà mwandà wà mikùkùkù, bu Nzambi mwà kutùtùminawù, dîbà adi netwikalè bakùmbàne mwà kuwùmvwa bimpè menemene.

<sup>8</sup> Twamb'eku twamb'eku, dyondopa dyà kùdi Nzambi dîdi ànu cì—cìshì cyela ku ndòbo, bwà kukwàta mushipa awu, munùdi bamanyè amu. Cìdi ànu cyôci aci...Mushipa ùdi ùkwàta ku cìshì ne ùmina ndòbo. Nànkù cyètù cyà mushinga...Cyètù cìmwèpele cyà mushinga ncyôci eci, cyà ne, misùkà yìpeciibwè bwà Yesù Kilistò.

<sup>9</sup> Bu Nzambi mwà kukwondopa dilòlò edi, udi mwà kusaama kàbidì kumpàlà kwà wèwè kufwà. Udi mwà kusaama cyàkàbidì, mu cidimu cìmwè kuumukila ku mpidyewu, anyi bidimu bibìdi kuumukila ku mpidyewu; udi mwà kusaama mu lumingu lùmwe kuumukila ku mpidyewu, anyi ditùkù dìmwe kuumukila ku mpidyewu. Neyèna mumanyè to. Kàdi kùdi cintu cìmwèpelè cyà bushùwà, neùmukè pa buloba ebu, dìmwe dyà ku matùkù àdi paanshi aa, bwalu eci cidi ànu citeetela cilamika.

<sup>10</sup> Kàdi musùkà awu wùdi ànu wùdìdinga wùbwela mu dipetangana ne Nyumà Mwimpè ne ùledìibwa cyàkàbidì, wèwè udi ne Mwoyi wà Cyendèlèlè. Cìdi cyènzekà kaaba aka nànsha ciikàle cinyi, wèwè kwènà ubùtuka nànsha. Yesù wàkamba ne: “Ewu udi umvwa Méyì Àanyì, wìtabuuja Yèye wàkaNtùma, ùdi ne,” aci's ndìbà dyà mpidyewu, “Mwoyi wà kashidi, kààkubwela mu dipiila to; kàdi ùkaadi,” cikondo cipite, “muumùke ku lufù muyè ku Mwoyi.” Aci's ncifwànyine kutùvwija twètù bònso ba-Méthodistes ne tubanga kwela mbilà, (kì mmwòmò anyi?) ncyà bushùwà, pa kwela meeji ne, Nzambi mmwenzè nànkù. Mpidyewu, aci kí n'dìyì dyànyì mèmè to; adi's n'Dyèndè, Yone Munsantu 5.24.

11 Yone Munsantu 6, Yesù wàkamba ne: “Ewu udi udyà mubidi Wànyì, ne ùnwa Mashi Àànyì, ùdi ne Mwoyi wà kashidi; ne Nèmmubiìshè ku lufù ku ditùkù dyà ndekeelu.” Ncyà bushùwà. “Ewu udi udyà mubidi Wànyì, ne ùnwa mashi Àànyì, ùdi ne,” aci’s ndìbà dyà mpindyewu, “Mwoyi wà kashidi.” Mpindyewu, eci “cyà kashidi,” kacýena ànu cìya kuumukila ku ditàbuluja too ne ku dikwàbò to, kàdi cìdi cìya mu Cyendèlèlè.

12 Nènku mpindyewu, bwà bàmwè bàà ku nwènù bambi bàdi basòmbe kaaba aka abu, bamanyè ne “Mwoyi” wà kashidi awu wùdi wùfùmina ku mwàkù wùmwèwùmwè wùdi wùmvwija ne “Mwoyi wà Nzambi.” Mwàkù Zoe, mwàkù wà mu cyena Ngelikà, wùdi wùmvwija ne “Mwoyi Sungasunga wà Nzambi.”

13 Dìbà adi, tudi tulwa mwànà wa balùme anyì mwànà wa bakàji wa Nzambi, mùtòlokù wà Nzambi, biikàle ne citùpà cyà Mwoyi wa Nzambi munda mwètù. Katùvwakù bafwànyìne kubùtuka to ànu mùvwà Nzambi kàyì mwà kubùtuka amu, nànsha twètù bateetè. Pa nànkù, tudi ne Mwoyi wà kashidi; ne netùbiìshiihwè ku lufù mu ditùkù dyà ndekeelu. Abi kí mbilenga bilayà anyì? Aci’s ncifwànyìne kwenza ne ba-Baptistes, ba-Méthodistes, bàlabulangane ku cyanza ne beelè mbilà. Kí mmwòmò anyì? Ncyà bushùwà nànkù. Ncyà bushùwà.

14 Ki cintu cìmpè cyà ntèdeleelu wa kale awu ncyòci aci. Ùdi ànu wènza ne bantu bònsò bàsombè pàmwè ne bānanganganè muntu ne mukwèndè. Ncyà bushùwà nànkù. Ùmusha tuumaalu twònsò tùdi tutàpululangana atu, ùvwija bifùkiìbwà bipyabipyà. Necyenzè ne—nkoozi wa tuxédo, ne cinsalàpeetà, bèèlanganè mabòko umwe ne mukwàbò bàmba ne: “Mwanèètù wa balùme, lòndà tǔng udi bìshi matùkù aa?” Ncyà bushùwà. Mmwòmò ki mwènzàbò. Necyenzè ne nkanzu wa ùnanýika, ne wa ndandà, bèèlanganè mabòko bàmba ne: “Mwanèètù wa bakàji, ndi mukunangè.” Ke cìdici cyènza menemene. Ncìdici cyènza cyà bushùwà, cìshimbula ànu dishiìlangana. “Mubanji anyì mupèlè, mupika anyì mudishikàmine, tudi bònsò umwe mu Kilistò Yesù.”

15 Mu dyàlumingu, ku tabernacle, mùndi mmòna ne kùdi musùmbà mujimà wà beena tabernacle basòmbe mwab’ewu, tuvwa ne—tuvwa ne—ne dìleesònà dyà kàlaasà kàà Dyàlumingu pa ne: “bupikudi ku mashi.” Ki mèmè kwangaciibwamù, mu mùshindù wà ne ndyùmvwà ànu bu ne ndi mu cipaapu cikwàbò mwaba kampànda, pa: *Bupikudi Ku Mashi*.

16 Nènku dilòlòlò edi, paanyimà pàà dīkù dimane kuumuka ne dilwè kùnweku ne bwebwebwe, bwà kufika ku ditèeleja disangisha dyà misambu, ne bikwàbò, mvwa nsanganyiibwa mu cibambalu amu. Nènku kumwèkabi ànu bu ne... Mèmè kubanga kubala mu Mifundu, ki mèmè kupeta cintu kampànda. Mèmè kudyàmbidila ne: “Èè, bu Mukalenge mwà kwanyisha, nèngààkulè ànu pa cyòci aci katanci kakesè dilòlòlò edi.”

17 Mbwenà kwamba ne, *Bupikudi ku Mashi*, mu dyàlumingu. Mpindyewu, dilòòlò edì, nêngiikalè mwà kwakula pa *Bupikudi Ku Bukolè*. Ne mààlabà dilòòlò nengàakulè pa *Bupikudi Mu Kaabujimà*, (bu Nzambì mwà kuswà, mmùmchè ne), *Mu Disànkà*. Mu mashi, mu bukolè, ne mu disànkà; bupikudi's!

18 Nènku bwà kupàtula cyôci eci...Mpindyewu, bantu bààbúngì, bu bamanyi bàà mabàlà bimpè, bàà balonge túlaasà mbamanyè bwà kudibwinkamù ne kufila mabuulula àà mùshindù ewu, pàmwàpa, bwà *cikampànda*, anyi *cikansanga*, anyi kulekela dikwàbò. Kàdi, mèmè, ndi mwenzè ànu bu umwe wa ku mùshindù wà bayiishi bàà kabàyì balonge kàlaasà aba bàdi...Cintu cimwèpelè cìndi mumanyè bwà kwenza, bwà kwikala mutwìshìibwe ne ndi pabwìpì menemene ne bulelèlè, nànsha bishi, ncyà kuya ku mindidimbì. Bu mèmè mwà kutwàdija kwenda mutàngile lwà ku cimanu, ne bukènkè bwikàle *elu* luseke, mvwa mwà kumanya cìdi, kumanyaku mmwènekèlu ùmvwà nendè; ní mvwa nyama wa mikòlò yìnaayi, anyi—anyì nyuunyi, anyì cyònsò cìvwàci aci, bu mèmè mwà kumòna mùshindù wà mundidimbì ùndi ndeeja.

19 Mpindyewu, Dipungila Dikùlukulu dívwa mmundidimbì wà Dipungila Dipyadipyà. Cìvwa nciibùlòjì. Bu mùdi ngondo, kùdi díbà; díbà didi dikenkeshà pa ngondo, ùdi ùleeja bukènkè pa buloba. Ne mèmè ntu ànu munangè Dipungila Dikùlukulu! Ndyùle ànu tètè ne mifwanù mùshindù awu, anyì, mùdìbi mwà kwikala amu. Mpindyewu, cipwàngàne...

20 Mu Genèsè, pààkenzà Nzambì di—díbà, dyàmbedi, ngondo kulonda apu, ngondo ne díbà bìdi bìleeja Kilistò ne Èkèleeziyà. Pàdi ànu díbà dibànda mu bukòlè bwàdi ne butùmbi; ne pàdidi dipweka, didi dìleejila bukènkè bwàdi ku ngondo, mu mìdimà, bwà kufila bukènkè pa buloba pàdi díbà diyè apu. Yesù, pààkumukàYe, Wàkabwela mu Butùmbi ne kuleejila Bukènkè Bwendè pa Èkèleeziyà; bwà kupèèsha, Èkèleeziyà, Bukènkè bwà Èvànjeelìyò too nepààlukilàYe, kaa, ekèlekèle, nènku díbà adi nebàselanganè. Aci's neciikale cilenga cyà dikèma. Neciikalè Bukènkè bùmwèpelè bunène bwà ngondo ne...“Mwànà wa mùkòòkò ke udi bukènkè bwèndè.” Kabààkajinga kàbìdi díbà, mu Cimenga aci to.

21 Mpindyewu bwà didyànjila-kumòna dikesè, twàlukilàayi mu Ekèsòòdè. Ne ndi ntèkemena ne kanwènà nucyòka bwà pàndi mèmè ngàakula mu Ekèsòòdè to.

22 Musangu kampànda, mu èkèleeziyà wanyi dyàmwàmwà dyà musùlù, mvwa muyiishè, ngèèla meeji, bu cidimu cijimà ne ngondo yisambòmbò nànkù awu, pa Yobò. Dilòòlò dyònsò bàvwa mwà kwalukila, mvwa mwà kwangata citùpà cikesè cyà Yobò, ne, ntùngunuka, tuvwa twenda tucipicishila mu Bible.

23 Mufundu wònsò wùdi wùnwàngana pàmchè. Kakwènakù dibèngangana dyà mèyi mu Dìyi dyà Nzambì to. To, mukalenge.

Katùpà ne katùpà, kapwàngàne! Mukàndà wùmwèpelè wùkaadiku mufùndiibwe wùdi musonsòdiibwe mùshindù awu, wùdi mwà kwikala mupwàngàne menemene. . . Mufùnda kùdì bafùndi bààbùngì, ne nkàmà yàbùngì yà bidimu mibàtápùlùle; ne yònsò wa kùdibò, ku dyakula dyà Nyumà Mwímpè, byònsò bìnwàngana pàmwè. Ki bwà cinyi, bwà mikàndà mikwàbò mitenteka yònsò eyi, yà Maccabées ne bikwàbò, kayèna yìnwàngana ne Ewu to, pa nàнку ncyèna nyiitaba to. *Eci's* n'Diyi dyà Nzambi, bwànyì mèmè.

24 Ki muntu mukàjì kampànda kumfùndilayè mukàndà wàmba. . . Mvwa nyiisha; Yobò pa mushiki wà butù. Yèyè ne: “Mwanètètù Branham, wèwè ewu's, uvwa ne Yobò pa mushiki wà butù kùkaadi ntàntà bule bukùmbàne, kwènàku wela meeji nàнку anyi? Udi pù kukaadiku mbingu mitwè ku yisambòmbò.” Yèyè ne: “Mòna's, wèwè kwènàku bwà kumuumusha pa mushiki wa butù apu anyi?”

25 Èè, mèmè ne: “Pààlekelà Nyumà Mwímpè kupàtula Méyi awu muntwamu, ngèèla meeji ne nebikèngele ànu bwà mèmè kulekela dicyàmba.” Kàdi bumùcidiYe kacya wàndamina ngààkula bwèndè yèyè pa mushiki wà butù, èè, mvwa ànu kacya ngààshààla naaci; ne misuùkà pàayi yènda yisùngidiibwa.

26 Pa nàнку, ànu mùvwà mutangadiki awu amu, kufikayè mu cimenga amu. Kuyiishayè, dilòòlò kampànda, kuyiishayè pa kanyinganyinga. Dilòòlò dyàkalondà, kuyiishayè pa kanyinganyinga. Dilòòlò dyàkalondà adi, kuyiishayè pa kanyinganyinga. Paanyimà pàà malòòlò bu ànaayi anyi àtaanu nàнку awu, kasùmbù kàà balami kààkatwilàngana nendè ne kwambabò ne: “Mwanètètù, kwènàku mwà kuyiisha cingà cintu cidi kaciyi kanyinganyinga anyi?”

27 Yèyè ne: “Kaa, èyowa's. Bòbò bònsò bǎnjì kunyingalala, dyàmbedi, pashiishe nényiishè pa cintu ckwàbò.” Pa nàнку awu's m—meeeji mimpè. Bòbò, muntu ne muntu, ànyingalalè, dibà adi tudì mwà kuyiisha pa ckwàbò cintu. Eyo.

28 Bwà didyànjila kumòna dikesè mpindyewu, kùdì aba, anyi nangànangà aba bàvwà kabàyi mu Tabernacle dyàlumingu mu dindà. Tudi baswè kwalukila ku nshapità wa 12. Kàdi meeji ètù à nshindameenu dilòòlò edi àdi mu nshapità wa 14, kubangila ku mvensà wa 13 wa Ekèsòòdè. Mpindyewu, tudì bashiile ku mvensà wa 10, mu dyàlumingu mu dindi, bwà “*bupikudi ku mashi*.” Ciibùngì cyà kunùdì nwènu bònsò ncimanyè bwalu bulonda ebu, ndi mutwìshùbwe.

29 Mpindyewu tudì bamanyè ne tudì bafwànyine kukùdimuna mabeji à Mukàndà ewu, ne kubuulula mabeji aa. Kàdi kùdì ànu Umwèpelè Udi mwà kukàngula Mukàndà, awu's n'Yesù Kilistò.

30 Yone wàkamòna Mukàndà awu. Wòwò ùvwa mutwibwe citampì. “Ne wàkadila mwadi bwalu kakùvwa muntu nànsha umwe mu Dyulu uvwa mwà kuWùbuulula to, muntu nànsha

umwe pa buloba, muntu nànsha umwe mwinshì mwà buloba. Kàdi kùvwa Mwánà wa mùkòòkò uvwa mushipa kacya ku difùkà dyà dyulu ne buloba, wàkalwa kwangata Mukàndà mu cyanza cyà dyàbalùmè cyà Ewu uvwa musòmbe pa Nkwasa wa butùmbi awu, ne kukàngula bitampì ne—ne kukàngulayè Mukàndà awu—awu, wàkalamuna bitampì byàwù. Ne Yèyè uvwa mukùmbànyine, bwalu Ûvwa mushipiibwe kacya ku difùkà dyà dyulu ne buloba.”

<sup>31</sup> Twàkulàayi Nendè, dilòòlò edi, ne tùMulòmbàayi bwà kutùkàngwilaWù ànu mpindyewu ewu.

<sup>32</sup> Mpindyewu, Taatù wa musàngeelu, wa dinanga, nyèwù tulwa Kùdì, biikàle tuKwambila, dyàmbedi, mu Dìna dyà Yesù. Tusambila mpindyewu, ne, patùdi biimàne mwab'ewu apa, babwikidiibwe mwinshì mwà musàkà ewu, dilòòlò edi, pambèlu pààpa pàdi cipeepèlè cicolè cifuuna, mvula yifuuna ne yituuta cipeepèlè, tudi ne kusàkidila kwàbùngì bwà kwikala ne nzùbu wa Nzambì bwà kubwelamù. Ne tudi ne kusàkidila mùdiku kwikàle lumbu, cinyeemenu; Wèwè wàkamba ne: “Dìna dyà Mukalenge didi lumbu lukolè; baakànè bàdi banyeemenamù ne bàsanganyiibwa mu dikùbiibwa.” Tudi ne disànkà dyàbùngì dyà mutùdi bamanyè Dìna dyà Mukalenge, ne mutùdi babwele mu Dyòdi.

<sup>33</sup> Mpindyewu tudi tulòmba bwà Wèwè kutùkàngwilakù Dìyì edi, dilòòlò edi, Taatù. Swàkù bwà Nyumà Mwìmpè àlwe àbwele mu Dìyì. Tengulàku mishìkù yà musadidi udi mudipwekèshe ewu, ne myoyi yà aba bààtèèleja, bânà Bèèbè abu. Nènku swàkù bwà Nyumà Mwìmpè àngatè ànu Méyì à Nzambì ne àÀtèèkè mu mwoyi wònsò, ànu mwaba wùdiWu àKèngediibwa awu. Tùbènèshèku mpindyewu. Vwijùlùlùku meeji ètù mapyamàpyà, dilòòlò edi, mu Nyumà Webè. Petèlaku butùmbi ku disangisha edi. Sùngilàku bajimine. Ondòpaku babèèdi. Alùjàku Kumbèlu aba bàdi batwè cimpingà, Mukalenge. Nènku netùKupè butùmbi, bwalu tudi tulòmba nùnkù mu Dìna Dyèbè, dyà Mwân'Èbè munanga, Yesù. Amen.

<sup>34</sup> Mpindyewu buulùlaayi ku mvensà wa 10 wa nshapità wa 12 wa Ekèsòòdè. Tuvwa tubala ne: “*bupikudi ku mashi,*” mùshindù mene uvwà Nzambì mulongòlòle mwánà wa mùkòòkò bwà kushipiibwayè mu nzùbu yònsò, mùshindù mene uvwàku kakùyì cintu nànsha cìmwè cìshàale.

<sup>35</sup> Manyooka àvwa ènda àmata, ne cilumbulwidi cyà ndekeelu mpindyewu cìvwa pabwìpì ne kumataci. Nzambì uvwa ne cyà kuuja Dìyì Dyèndè, ku dìleeta ne ku dìleeta. Ne manyooka wònsò àvwa paanyimà pààpa awu àvwa cimanyinu cipwàngàne, anyì cifwànyikijilu cipwàngàne, cyà manyooka àvwa pabwìpì ne kumata mpindyewu.

<sup>36</sup> Nènku bu nwènù mwà kumòna, kumpàlà kwà cilumbulwidi kumataci, mpindyewu bambi bàdi mwà kubènga kutwà ku

cyànyì pa cyôci eci, bìdì ànu bîmpè, kàdi kumpàla kwà cilumbulwidi kubangaci kutuuta Èjiipitù, Nzambi wàkutùma Izalèlèlà ku Goshènè. Bàvwa mu Goshènè, ne cipùpu nànsha cìmwè kacyàkabàlenga to. Cifwànyikijilu cipwàngàne cyà Èkèleeziyà wakambwibwa kumutù dyàmwàmwa, kàyì ùpicila mu dikèngà dinène to, nwamònu's. Èyo.

<sup>37</sup> Pashìishe ku cipùpù cyà ndekeelu cyàkatuutà buloba mwaba awu, anyì cyàkatuuta Èjiipitù, cìvwa ndufù. Nwènù babadi bônso bàà Bible kaaba aka, nudi bamanyè màleesònà ènù à kàlaasà kàà Dyàlumingu ne bikwàbò, nwàngaci cyôci eci, pàmwàpa, misangu yàbùngì. Kàdi, lufù ke lùvwà mwena lukunà wa ndekeelu wàkatuuta Èjiipitù.

<sup>38</sup> Nènku mwena lukunà wa ndekeelu wìkala mwà kulenga èkèleeziyà mpindyewu ndufù, mu ngaakwilù wa nyumà. Aba bìikala kabàyi baswè kulonda Kilistò, mu—mu dibàtiiza dyà Nyumà Mwìmpè abu, nebùùmínyine ne nebàfwe mu nyumà; maèkèleeziyà, nudi mwà kucìmòna mpindyewu. Paanyimà pàa matàbuluja manène àbùngì, ne batangadiki bapicile mu buloba, kàdi, nànsha nànkù, èkèleeziyà ùdi, mbwena kwamba ne, mu ngaakwilù wa beena cìdiidi, èkèleeziyà ùkaadi wènda ùtamba kunyanguka dîbà dyònsò. Bidimba Byèndè bìdì ànu byènda mu mùshindù wònsò ùdibi biswè awu, byènza cintu kanà cyònsò cìdibo baswè kwenza aci, cìkòlà, bàdibìikila mùdibo beena Kilistò, bàmba mùdibo ànu bîmpè.

<sup>39</sup> Kwìkala *mwena Kilistò*, mbwena kwamba ne kwìkala “mufwànàngàne ne Kilistò.” Kùyì uya mwaba nànsha wùmwè wùdì kùyì muswè kusanganyibwa bu Kilistò mwà kulwa to. Kwàmbi cintu nànsha cìmwè cyùdì kùyikù mwà kwamba pàdì Kilistò ùlwa to. Kùyì wenza cintu nànsha cìmwè cyùdì kùyikù muswè kwìkala munkaci mwà kwenza pàlwà Kilistò to. Kwèdikù meeji ku cintu nànsha cìmwè cyùdì kùyikù muswè kwìkala munkaci mwà kwelela meeji pàalwà Kilistò nànsha. Lamà kabingilà kèèbè kàmwèpelè, mwoyi wèbè mmushindamijila pa Kàlvaryò. Amen. “Endelà mu Bukènkè, bu mùdì Ye mu Bukènkè, nènku tudi mu bwobùmwè muntu ne mukwèndè, ne Mashi à Yesù Kilistò, Mwànà wa Nzambi, àdì àtùsukula ku bubì bwònsò.” Abu's mba-Méthodistes, ba-Baptistes, ne twètù bônso, pàmwè, àtùvwijèku bônso umwe mu Yèyè.

<sup>40</sup> Mpindyewu, cyà ndekeelu, cintu cyà ndekeelu cìvwa ndufù. Ne kumpàla kwà lufù alu kulwalù, kùvwà difuta dyà cibawu dyenjìbwe bwà lufù alu, bwà bônso bàdì ne dijinga dyà kupàndukakù.

<sup>41</sup> Ne kùvwà difuta dyà cibawu dyenjìbwe kumpàla kwà kabùtù kàà kumpàla, kàà kumpàla kwà mvùlà yà Noà aku. Nzambi ùvwa ne muyiishi wa bwakàne, Noà, ne wàkayiisha bidimu lukàmà ne makumi àbidi, bwà bantu kubwelabò mu

bwâtù. Ne aba bààkabèngà ku budiswilà bwàbò bwà kuya abu, kakúvwa kushààle cintu nànsha cimwè to ànu cilumbulwidi.

<sup>42</sup> Nènku, leelù ewu, muntu udi ubènga bwà kwendela mu Bukènkè bwà Kilistò awu, udi mudyombòle ngàsà, pa nànku kakücyèna cidi cishààle kàbìdì nànsha cimwè to ànu cilumbulwidi. Kwàjiki. Kùdi ànu luseke lwà dyàbalùme ne lwà dyàbakàji, kùdi ànu lümwèpelè lwùdi mwà kuyakù. Nènku udi wenza disungula dyèbè.

<sup>43</sup> Mpindyewu, tudi tumòna ne, kumpàla kwà—kwà dilòòlò dinène dyà bwalu bukolè kulwadi, dyàkatùminàbo Izàlèlèlè dīyī adi, nènku tukàadi bamanè kwangata cyòci aci, bwà kushipa mwànà wa mùkòòkò.

<sup>44</sup> Nzambì úvwa munkaci mwà kubweja èkèleeziyà Wendè mu cimwangì, bwà kumupàtula mu Èjiipitù, kumubweja mu buloba bulaya. Mèmè ntu munange aci. Bàvwa bàya kuntwaku, bwà kwangata buloba abu. Nzambì wàkabàpèèsha buloba, kàdi bùvwa bwediibwe mu lupangu munda amu nzùbu minène, yà tutankù ne mpangu. Ne bimanu binyùngùlùkile Yelèkò, màkalù à mvità àvwa mwà kunyeemenapù mbilu ànyùngulukilapù. Kàdi anjì elààyibi pèènù meeji ku bwalu abu, nànsha nànku, Nzambì mmwàmbè ne: “Ndi munùpèèsheci. Buloba mbwènù nwènù.” Kàdi byàkakèngela bwà bóbò kukòmba, kubùkòmba.

<sup>45</sup> Nènku ki cidi Nzambì mwenzè leelù ewu ncyòci aci. Yèyè mmupèèshe muntu ne muntu wa kunùdi, udi muDiswe awu, dibàtiiza dyà Nyumà Mwimpè. Kàdi bìdi bikèngela bwà nwènù kubwelamù, KuBwàngata, kwàjiki; kulwisha dibèngangana, ne kuupula bimanu, ne kudítwamù ne kuBwàngata.

<sup>46</sup> Nudi nwamba ne: “Mpaasàtà mmwàmbè ne: ‘Kabyèna bwètù leelù ewu to.’” Tùngunukàayi ànu ne lwendu nùshiyè aci panyimà. “Maamù mmwàmbè ne: ‘Nenkwiipàte kumbèlu eku.’” Tùngunukà ne lwendu ùcipìte. “Bayanyì mmwàmbè ne: ‘Nenkushiyè.’” Tùngunuka ne lwendu ùcipìte. Kwàjiki. Udi ne cyà kuya ne kuBwàngata! Kwàjiki.

<sup>47</sup> Dyondopa dyà kùdi Nzambì didi bwà muntu ne muntu wa kunùdi. Yònsò wa kunùdi udi musòmbe kaaba aka dilòòlò edi ewu, mwikale ne kànsèrè, disaamà dyà mwoyi, ní ncinyi cyònsò cidiaku aci, Nzambì mmufile mulayi. Ne ngwènù nwènù, kàdi nudi ne cyà kuya kawàngata.

<sup>48</sup> Mpindyewu wèwè udi wamba ne: “Èè, ncyèna ànu ndyùmvwa bìmpè menemene to.” Aci kaciyèna naaci bwalu to. Mulayi ngwèbè wèwè. Nzambì ngudi mukupèèshewù. Bwela wèwè ànu cyanàànà ùshipe beena Peleshèètè, ku luseke ne ku lukwàbò. Ne pàtulamù beena Hivi bonsò ne—ne beena Amòòlà, ùbàshipe ùbàbùtùlè. Bwela wèwè ànumù, ùbwangàtè. Nzambì mmwàmbè ne: “Mbwènù nwènù. Ndàayi nùbwangàtè.”

<sup>49</sup> Kàdi Yèyè kàakambakù ne: “Mpindyewu, Mèmè nembwelèmu, kubikòmba byònsò kubyèla pambèlu, bwà



kunwibakila ndambù wa bimenga bilenga, ne kunùsòmbesha panshi mu mùsèsù mupepèlè to.” Yèyè kátu wènza nànkú to.

50 Yèyè ùdi ùkupèeshabù, kàdi wèwè udi ne cintu kampànda cyà dyenza. Yèyè mmwìmpè be bwà kunùpèesha buloba, mmwambè ne Yèyè ùvwa mwà kunùkwàcisha ne kwikala neenù. Ndàayi, nùkabùkwàtè!

51 Nènku pawikalà usaama, dilòlò edi, mucibùkile panshi, mpofo, mpudimaci, kamàmà, cyònsò cyùdi aci; ndàaku, ùcyàngatè. Nzambì mmwàmbè ne cìvwa cyèbè wèwè. Ncyèbè wèwè. Nzambì ngudi mukupèesheci.

52 Wàkabàmbila ne Yèyè neàbàpe buloba abu. Wàkatùma Mwanjèlò kumpalà kwàbò, bwà kubàkùba mu njila, bwà kubàbweja mu mwaba ùvwa buloba abu.

53 Tàngilàayi batentekedi abu pàakayàbo dyàmwàmwa. Ki bantu dikumi aba bàalukila, kwambabò ne: “Kaa, katwènakù mwà kwangula mpasu to. Kabyèna mwà kwenzekakù to. Mòna’s, twètù tudi beena maalu à mamanya, ne tudi bakenkète cintu aci. Bilondeshile maalu à mamanya kabyèna mwà kwenzekakù nànsha kakesè. Katwèna mwà kucyènza to.”

54 Kàdi kùvwa bantu bàbidì, umwe wa kùdìbo dyèndè Yoshùwà, ne umwe dyèndè Kaalèbà. Kabàvwa batàngila cìvwa luseke lwà maalu à mamanya alu to. Bàvwa batàngile ku cìvwa Nzambì mwambè. Bòbò kwamba ne: “Tudi mwà kucyènza.” Nènku aci ncyà bushùwà. Ki kwalukilabò ne cileeji kampànda cyà ne bùvwa mbuloba bwìmpè.

55 Ndi ne disànkà dyàbùngì dyà cileeji aci, (kí mmwòmò anyi?) cyà ne kùdi Buloba bwìmpè ànu kumutù kwètù eku menemene! Nènku tudi mu njila, dilòlò edi. Àlèluuyàh! Eyo.

56 Ki bòbò aba, mpindyewu, ànu pabwìpì menemene ne bupikudi. Nzambì wàkalòmba bânà bàà Izalèèlà, bwà kwikalabò batwishìlwe ne bàdi mu dikùbìlwa, bwà kushipa mwànà wa mukòòkò ewu. Ne bwà kulaaba mashi pa mukamba, kumutù kwà ciibi aku, nùnkú ewu, ne ku dikunji dyònsò.

57 Ne bìvwa bikèngela bwà kubwelabò ne kudyà mwànà wa mùkòòkò ewu, kantu ne kantu kàà ku wòwò awu; mònaayi, mwànà wa mùkòòkò wònsò awu, kí ng’ànú katùpà kàwù cyanàànà to. Katùpà ne katùpà kàwù kònsò kàvwa ne cyà kudiibwa.

58 Bàmwè bantu bàtu bàmba ne: “Nèngàngatè ànu aka katùpà, nènku nê—nèngìtabuuje aka katùpà.” Kàdi bikèngela ùCyàngatè cyònsò nkòong, katùpà kààCì kònsò. Wèwè udi wamba ne: “Kaa, ndi ngìtabuuja ne Yèyè wàkatàpiibwa mpùtá bwà kushipa kwètù kwà mikenji, kàdi, ‘ku mibùndàbùndà Yèndè,’ ncyèna mumanyè bwalu bwà Cyòci aci to.” Tudi bacìswe Cyònsò. Cìtùpà Cyàci cyònsò ncyà kudyà; Cyòci cyònsò nkòong.

Cimwè cyà ku Cyôci cidi cokolakana, kàdi tudi ne cyà kuCìdya, nànsa bishi. Nzambi ngudi mwambe nànkù.

59 Mònaayi mvensà wa 10 mpindyewu.

*Nenku nenù—kanùshìyi cintu nànsa cimwè too ne...mu dindà to; ne cìikalè cishààle...too ne mu dindà...necyòshìibwè ne kapyà.*

60 Nènkù, mpindyewu, nànsa cimwè cyà ku byôbi abi kacýèna ne cyà kushààla to; bintu byònsò. Mpindyewu, Yèyè wàkamba ne: “Dìbà dinùdi nuwùdya, kanùwùdi mubishi to, anyì mutumpa to, kàdi nudi ne cyà kuwùdya mulàmba bímpè.” Nènkù ndi muswè aci.

61 Bantu bàdi bàteeta kudyà Dìyì dyà Nzambi, kàdi bàdi baDyàngata ànu mùvwàdi dibishi amu; kuDicyànkunya, ne kutwilaPù matè, ne bikwàbò byònsò. Bàmba ne: “Kaa, ncyèna ànu mwà kuDyàngata to. Ncyèna mwà kuDitwàla to.” Kì nDilàmbiibwe bikùmbàne menemene to. Kwàjiki.

62 Yèyè kwamba ne: “Wipìkaayi ne kapyà.” Kapyà kàdi kàleeja Nyumà Mwímpè. Udi ubweja Nzambi munda mwà mwoyi wèbè, dyàmbedi, ne Yèyè neàkulàmbilàDi. Ncyà bushùwà. Dilàmbiibwe Dipyè, dibobesha, ditwisha mukèlè, dìbà adi Didi ne mwenya wà dikèma.

63 Mpindyewu, kwènà mwà kwimanyina pa bule mùshindù awu to, pambèlu, wamba ne, “Kaa, ncyèna—ncyèna mumanyè ní Didi bwànyì mèmè, anyì to. Aci’s ncifwànyìne kwikala bwà matùkù àkaadi mapite.” Anjì petà ànu Nyumà Mwímpè, dyàmbedi, kàdi ùtangile ùmonè cidi dyondopa dyà kùdi Nzambi dyùmvwija bwèbè wèwè dìbà adi.

64 Tàngilà cidi ntèdeleelu wa meeji matòòke ùmvwija bwèbè wèwè dìbà adi, paùdi ne Nyumà Mwímpè kaaba aka bwà kulàmba Mwànà wa mùkòòkò pàdiYe ùlwa apu. Amen. Ncyà bushùwà. Ipikà Mwànà wa mùkòòkò, dyàmbedi. Ne bidi bikukèngela Kapyà kàa kuMulàmba naakù. Ùdi ne cyà kulambiibwa mu mudilu ntàntà mule. Kaa, ekèlekèle, s’ki dìbà didiWu mwímpè adi. Ùtèèkaayi pa mudilu ntàntà mule, ùdi ànu wòsha byònsò... .

65 Mwva mwimàne mwab’ewu, matùkù mashààle aa, ku luseke lwà màshinyì manène àdi èngulula byamù, ki mème kumvwa mùvwà luuyà lwà mudilu awu lukolè’s, ne lùvwa ànu lùlamba ne lùlamba ne lùlamba. Pàvwàci citàmba kukwàta kapyà bikolè menemene, di—dimòmènà òvwà mu byamu, mu ngòlò, dyònsò òvwà dibànda pamutù, ne bàvwa badyùmusha. Nènkù bàvwa mwà kuteemesha kapyà babàndisha ndambù mu cyengulwidi amu. Ne pashìishe pàvwà cyôci eci cifwànyìne kutàmba kusàbishiibwa, bàvwa mwà kupeta bikwàbò bintu bishìilèshìilàngàne, bunyingunyingu bwà soufre ne bikwàbò, bipàtukamù.

66 Cyàkapàtuka kumpàla cìvwa mmanyaanù, bu mùdì manyaanù ne bitoci. Cyàkalonda cìvwa bu tubanda, kaa, cintu kampànda cìvwà kaciyi cìmpè to; ne argent mutàmùke, ne bintu bikwàbò byònsò ebi, bidì bibànda, ne bàbyèngulula. Bènda bàpweka, ne kwìnshi menemene, ne cintu cyà ndekeelu cìvwàbò bàngata cìvwa bunyingunyingu bwà soufre. Cyòci ke ngòlò wa bakùtākàne.

67 Nudi bamanyè ne kùdì bintu búngì cyanààna mu bantu bàdì bàteeta kukùtakajangana paùdì mwena Kilistò apu, anyi kwenza maalu mùshindù awu, nànsha byà munyi. Nwamònu anyi? Kàdì udi ànu ulekela Nyumà Mwímpè wènda ùsàbisha bintu byònsò abi, ùpàtula—ùpàtula ngòlò yònsò wa bakùtākàne awu munda mwèbè, kàbidì.

68 Ngòlò wa bakùtākàne, bantu bàbúngì bàsòmbèla bààya ku Wesètè ne bàdì bàsangana umwe wa ku yòyi ayi, ne beèla meeji ne, kaa, mbafikè pa biinà byà ngòlò. Ùdì ùkenka kupita mùdì ngòlò ùkenka amu. Kàdì's n'ngòlò wa bakùtākàne, kènà ne mushinga to.

69 Nènku mpindyewu bàtu bàmulàmba, ne bàtu bàmwengula yònsò, ne bàtùngunuka ànu ne kumulàmba ne kumulàmba, too ne mùdiye ùshàala ngòlò mukezùke, musàbisha mushiya ànu ngòlò wetù ewu lukàmà pa lukàmà.

70 Nènku mùshindù awu ngùdì Nzambi wènza mu Èkèleeziyà Wendè, ùpòngolola Nyumà Mwímpè pa Yèyè, ne ùlàmbamù too ne pàdiYe wimansha maalu wònsò à pa buloba awu pambèlu, ne tulumbùlumbù, ne citù, ne byònsò ebi, too ne mùdiYe ùbìsàbisha ùbìpàtula munda mwà muntu nkààya yònsò wàlwà kùdiYe. Amen.

71 Mpindyewu, dìbà adi, nudi mwà kucidya. Meeji makwàbò malenga ngòwò aa apa, pa—pa mvensà wa 11.

*Nènku mùshindù ewu ke unwàwùdyà; ne byènu*  
(Tèelejàayi eci.) *mikàbà miswika mu bimònu byènu, . . .*  
(Ndi muswè aci.) *. . . bisàbaatà ku makàsà ènu, . . .*  
*dikombo mu cyanza cyènu; ne nenùwùdye mu*  
*dilwìjakaja; ndipità dyà YÈHOWÀH.*

72 Mèmè ntu munangè aci. Panùdì munkaci mwà kudya apu, ikàlaayi badìlongòlòle bwà kuya. Ki ndekeelu wa bwalu nyèyè awu.

73 Tùbuululàayi mu Efèsò, lwà ku nshapità mwi6 wa Efèsò aku, nènku tàngilàayi mwaba ewu cìvwà Pòlò mwàmbè bwà kulongolola Èkèleeziyà; nshapità mwi6 wa Efèsò, kubangila ku mvensà wa 14 wa nshapità mwi6.

*Nènku imànaayi, biikàle badiswike mu bifukà byènu*  
*mukàbà wà bulelèlè, . . . biikàle ne cibwikilu cyà pa*  
*cyàdì cyà bwakàne;*



82 Kale wàwa mwà ne mulombodi wa misambu ku tabernacle, musambu wètù wà cikùmà wùwwa ne:

Mvità mmifwîmè, Kaa nwênù mäsàlaayi à  
 Kilstò,  
 Batàngilàngàne mu milongo myumisha ne dîsù  
 dikolè,  
 Ne byà mvità byèngelela, meekala èla nsèsà,  
 Bwakàne ne bubì mbimànyìnàngane leelù ewu.  
 Mvità mmifwîme, kàdi kanücyòki to,  
 Ikàlaayi bakolè mu dikàndà Dyèndè kwàtaayi  
 bikolè;  
 Piikalàbi ne Nzambi ùdi bwètù twètù,  
 dibèndelà Dyèndè kumutù kwètù,  
 Netwimbè musambu wà bàcìmunyi ku  
 ndekeelu.

83 Bààbúngì bàà ku bansantu bàà kale abu bàkaadi bayè mu lukità. Kàdi didìpu edi, dyàmwàmwà mu buloba bupyabùpyà amu, pààbwelàbo mu Buloba bulaya, dibèndelè dyà nkùrusè nedìikalè kumutù kwètù, nènku netwimbè musambu wà bucìmunyi. Patwàsòmbà ku Didyà dyà Dibanji dilòòlò adi, banyùngùlùkile mèèsà, mèèsà manène awu, pàmwàpa à bule bwà kilòmèetà binunu lukàmà ne makùmi àsambòmbò, ne bansantu basukula mu Mashi basòmbè bányùngùlùkile. Ndi muswè kwenda kupweka ne mèèsà awu bwà kulabulanganakù ku cyanza ne yònsò wa kùdìbo, amen, bìikàle ànu twela mbilà. Nudikù baswè kungumvwa ngèèla mbilà anyi? Indilaayi pangàáfika kuntu kwàka; nwantàngilaayi. Ncyènà bunène bukumbàne, nànsha nànkù, bwà cyòci eci to.

Kàdi, mònaayi, mu lwendu lwà mindòlòlooci mpindyewu. Dilongòlòlaayi. Tuyààya.

84 Cimfwànyì cyà dibungama ncyòci eci, kumpàlà kwà twètù kufika ku dìleesòna dyètù dyà ciibidilu edi, cìdi cìsanganyibwa mu mvensà wa 38 amu. Tèèlejàayi.

*Ne musumbà wà bantu basambàkàne kubàndawu ne bisumbù byàbò byà mikòòkò . . .*

85 Ke mwaba wàkenzelà Izàlèèlà cilèma ngwòwò awu's. Citàmbe-mfùkulu cimane kwenjiibwa. Bantu bàvwà kabàyì bakùdimùne mucimà bàakalonda bwà citàmbe-mfùkulu, ndekeelu wa byònsò kubàbwejabò mu lutàtu. Nènku kwìnshi aku, netùmònè kaaba aka, lwà ku mvensà wa 42 ne mvensà wa 43 aku. Mukalenge wàkula ne Mòsà, wàmba, ne: "Muntu nànsha umwe pa kuumusha aba bàvwàbo balàmbule abu . . . kabàvwà mwà kudyà mulàmbù awu to," anyì, "pa kuumusha aba bàvwà batengùdiibwe abu. Beenyi to, beena pambèlù to, muntu nànsha umwe kàvwà mwà kuwàngata to pa kuumusha aba bàvwà batengùdiibwe abu."



kumpalà kwètù, dyènza bimanyinu bîmwèbîmwè abi ne maalu à kukèma. Ne mulongeshi kanà yònsò ewu mwaba ewu, anyi mumanyi wa dibàla wa Bible, mmumanyè ne Mwanjèlò wàkalonda Izalèèlà awu ne kubàlombola too ne ku buloba bulaya, ùvwa Mwanjèlò wa Cipungidi, uvwa Yesù Kilistò.

<sup>93</sup> Nènku, leelù ewu: “Yesù Kilistò umweumwe awu makèèlèlà, leelù, too ne kashidi” ùdi ùlonda kumpalà kwà kasumbù aka kanùdi baswe kubìikila ne mbansantu babunguluki bàà mu malaba, panwikalà baswè. Èyo. Mutùngùnùke, wènda ùlombola ku bucimunyi too ne ku bucimunyi! Nzambi àtumbè!

<sup>94</sup> Mu matùngà awu, mu matùkù awu, bàvwa bapeetùdìibwe ne bakinyiibwe ne babèngiibwe, Ne badyombòdìibwe kùdi matùnga, ne bàtwibwe mènà ònsò.

<sup>95</sup> Ke mùdìbi kàbìdi leelù ewu, ne mwena kwitabuuja mulelèlà. Nwènù, mu èkèleeziyà yènù amu, s’nudi bamanyè, panùdi nwangata luseke lwà Kilistò ne nwakula bwà Bulelèlà, èkèleeziyà mujimà ùdi wàmba ne: “Mutàngilaayaaku! Mmujimije lungènyi. Mmubùlùke.” Nwamònu anyi?

<sup>96</sup> Kanùtèyikù ntèmà to. Tùngunukàayi ne lwendu. Nwènù mu kaabujimà nudi balwàcishiibwe byà mvità mpindyewu. Ne Mashi àdi ènda àya kumpalà kwènù; Nyumà Mwímpè munkaci mwà kunùlombola. Tùngunukàayi ànu ne kuya. Kanùtèyikù ntèmà ku cidì muntu nànsha umwe ùnwàmbila to. Tàngilàayi buludì ku Kàlvariyo, ne tùngunukàayi ne kuya kumpalà. Ncimfwànyi cilengèlè!

<sup>97</sup> Mpindyewu, bàvwa bapàtùke, bapìcilemù, ne bapetè. . . Nènku mpindyewu mònaayi ne, bupikudi bwà mashi bwàkabapàtula mu Èjiipitù, mpindyewu bivwa bikèngela bwà kupetabò cintu kampànda cikwàbò mpindyewu bwà kuyabò naabò mu buloba abu. Mpindyewu bàkaadi ànu bàbangì bwà kutwàdija. Bàvwa bapàtùke, batengùdìibwe, babwelè mwinshì mwa mashi, ne bamate mu njila. Mpindyewu bàkaavwa bafikè ku cintu kampànda. Bàvwa bènda bàya kuntwaku, bamanyè ne bàvwa buumùke ku lufù bayè ku mwoyi; bamanyè ne bàvwa ne Mwoyi wà Cyendèlèlè.

<sup>98</sup> Kàdi’s ki bóbò aba, bàbànda mpindyewu, ke lutàtu kubanga kujuuka. Ke cilwilu cyà Pàlò cilwalwà eci, cyènda cìbàdimbata, bwà kubàkwàta. Ndululu kubwelayì.

<sup>99</sup> Tèèlejàayi! “Nzambi ke cinyeemenu cyètù ne dikànda dyètù, dikwacisha mene dītù kadiyi dīpangika mu cikondo cyà lutàtu.” Kaa, ndi ntèkemena ne nudi numòna eci. Nwamònu anyi? Ncyòci eci. Manyàayi. . . Kàdi, tèèlejàayi, mvensà wa 13 mpindyewu.

*Ki Mòsà kwambilayè bantu ne: Kanùciinyi to, . . .*

<sup>100</sup> Ndi munangè aci. Paanyimà pàà Yesù mumanè kubìika ku bafwè, Méyi Èndè àvwa ànu díbà dyònsò ne: “Kanùciinyi to.”

<sup>101</sup> Ke lutàtù lùdì naalù Èkèleeziyà leelù ewu ndwòlò alu, mmukwàcike bwòwà bwà lufù bwà ne nenùpangilè bwalu. Mmunyi mùdì mwà kupangila paùdì munda mwà Kilstò? Kwèna mwà kupangilaku to. Udi ne Mwoyi wà kashidi. Démons yònsò yà mu ifernò kayèèna mwà kukunyùkushakù to. Wèwè udi ne Mwoyi wà kashidi. Ki mwàkambà Yesù. Pa nàнку kùkwàciki bwòwà bwà kupangila nànsa.

<sup>102</sup> Wèwè udi wamba ne: “Èè, ndi nciina ne nkwèpì kùngààlwà kulwa mukoleshi wa maalu.” Mbipicìbwe ne mèmè mwenze dikolesha dikesè dya maalu pamutù pàà kwikala musòmbe mupùwe kàdì nciyi ngèza cintu nànsa cìmwè to. Ncyà bushùwà ne ki cìndì mufwànyine kwenza. Muntu wíkala mwà kwenza cintu kampànda . . .

<sup>103</sup> Bàdì bàmba ne Ballard ewu, muntu kampànda wàkalwa bwà kukèba mudimi kùdìye, ki yéyè kwamba ne: “Fùnda dìnà dyèbè kaaba aka.” Yéyè kwangata crayon wendè, bwà kufùndaye. Yéyè ne: “Kandundu kèèbè kàà kukùpula naakù kàdì penyì?”

Yéyè ne: “Ncìtu . . . ncìtu ngèza bilèma to.”

Yéyè ne: “Ncyèna mwà kukwàta neebè mudimu to; kwakwenza cintu nànsa cìmwè to.”

<sup>104</sup> Ncyà bushùwà. Kwèna wenza bilèma to, kwèna—kwèna wenza cintu nànsa cìmwè to. Tùyaaku, mwanèètù. Imàna kuulu tuye. Ndi munangè Longfellow wàwa:

Kùngambidìku, ne myâkù yà mwadi ne,  
Mwoyi ùdì ànu cilòòtà cyà munda mutupù to!  
Ne musùùkà wùdì mulààle tulù mmufwè to,  
Ne bintu kabyèna mùdìbì bìmwèka amu to.

Yéyè ne:

Èyowà, mwoyi ngwà cyà bushùwà! Ne mwoyi  
ncyeyà!  
Ne lukità kì nkiipàcìlà kààwù to;  
Wèwè udi lupwishi, udi walukila ku lupwishi,  
Kacyàkambiibwa bwà musùùkà to.  
Tùjuukààyi bwà twènzè mudimu,  
Ne bukìtu mu dikòkangana kanà dyònsò;  
Kwikadi bu ngombe wa tumàmà, wà bàsàka to!  
Ikàlà cilòbo!

<sup>105</sup> Kwìndidi bwà bantu kukuswìshishabò kùdì Kilstò to. Juukilà kuulu bu muntu mulùme anyì inàbànzà, ùMwitàbè, ne ùye mutàngilè kumpàla mu bucìmunyi. Amen. Ke cìdì Nzambì muswè aci, màsàlaayi makàyàbàlè, mìkàlè pabwìpì. Udi mufwànyine kwikala kùyì, ne bujìtu bwà kilò makumi àsambòmbò ne yìnaayi to, kàdì udi ànu mwà kwikala mukùnzùbile, mwanèètù, kàdì mùlè tètè ne bukolè, bu wèwè ànu mwà kulekela Nzambì ùdyàngacila njila Wendè. Nkaatukù mumòne mulùme wa bujìtu bwà kilò makumi citèemà, kàyì



ne bujitu bwà grammes makumi àbìdì ne mwandamukùlù yà bulùme munda mwèndè nànsha. Ncyà bushùwà. Èyowà. Mònaayi.

...*Mòsà wàkambila bantu ne: Kanùcìnyì...  
to, shààlaayi bapùwe, ne numòne lupàndù lwà  
MUKALENGE,...*

106 Mbîmpè. Tùngunukà ànu ne lwendu. Kùkwaciki bwôwà bwà cintu nànsha cimwè to. Pawikalà mwitàbe Kilistò bu Musùngidi webè, tùngunukà.

107 “Mwanèètù Branham, ndi muswè dibàtiiza dyà Nyumà Mwîmpè.” Tùngunukà wèwè ànu ne kuya. Kùcìnyì to.

108 Wèwè udi wamba ne: “Ndi nsaama mpindyewu, Mwanèètù Branham. Ncyèna mwà kuya kule menemene to.” Kùzengedikù to. Tùngunukà ànu ne kuya; nudi numòna lupàndù lwà Mukalenge wetù’s! Lwitàbùùje. Tùngunukà ànu ne kuya cyanààna.

109 “Nebìikalè bishi? Ngàngàbukà mmumbènge.” Mpindyewu, mulùmyàna awu s’mmwenzè ne mwèndè mwònsò mùvwàye pèndè mwa kwenza amu, kàdi Nzambi kàtu mwànji kwenza ne Mwèndè mwònsò to. Ncyà bushùwà.

110 Anji indilaayi kakesè, mutèèlèjaayi mpindyewu. Èyo.

...*MUKALENGE, lwànùleejayi ditùkù edi: bwalu bèèna  
Èjìpìtù (bateeci, bulelèlè-... bajuudi bàà ndululu)...*

111 Udi wamba ne: “Mwanèètù Branham, bu mèmè ànu mwà kulekela dinwà dyà mfwankà’s! Bu mèmè ànu mwà kutèeka dinwà dyà maalà edi panshi’s! Bu mèmè ànu mwà kulekelakù ànu kwiba kwànyì eku’s! Bu mèmè ànu mwà kwimakaja dyenza dyànyì dyà *cikampànda, cikansanga, ne cikankèngà’s.*” Kùcyòki to. Tùngunuka ànu ne lwendu. Nzambi nèacyuke byònsò bìdì bishààle abi.

112 “Ngìkala mumanyè ne mvwa mwà kucyènza, Mwanèètù Branham, s’mvwa mufwànyìne kwitaba Kilistò mpindyewu mene.” Kùtácishi meeji to. Tùngunukà ne kuya. Tùngunukà ànu cyanààna. Neùmone lupàndù lwà Mukalenge!

...*bwalu beena Èjìpìtù banùdì numòna leelù ewu  
aba, kanwàkubàmònakù kàbìdì to bwà kashidi. (Amen.  
Bwalu nebùdikòsè, paanyimà pàà katanci.)*

*MUKALENGE nèànùlwangèènè, ne nwènù nenwìkalè...  
nenùshaalè bapùwe.*

*Ke MUKALENGE kwambila Mòsà ne: Udi ungeela mbilà  
bwà cinyi? akùlà ne bàna bàà Izalèlèlè, bwà bàye  
batàngile kumpàla: (Mèmè ndi munangè aci.)*

113 Kanùteeci kwamba, kwamba ne: “Èè, mèmè ndi mukashààla wa mu èkéleeziyà, kùkaadi bidimu dikùmi, Mwanèètù Branham. Mèmè ewu’s ntu cidimba cìmpè cyà lulamatu.” Abi’s mbîmpè; ndi

ngàanyisha aci. Kàdi tùtungunukàayi, dilòlò edi. Nzambi ùdi munkaci mwà kutungunuka. Bantu leelù ewu, mwab'ewu, bàdi bàalukila, bàmba ne: “Èè, mpindyewu. . .”

114 Maalu à mamanya, kùkaadi bidimu lukàmà ne makumi àtaanu; kùvwa maalu à mamanya mu France, àvwà mambè ne: “Bu muntu mwà kuya lubilu lwà mùsà lwà kilòmèetà makùmi ànaayi ne mwandamukùlù ku dîbà dimwè, dikòkiibwa dyà kùdi buloba òvwa mwà kuumusha pa buloba, ne yèyè ùvwa mwà kuya.” Huh! Lubilu lwà kilòmèetà makùmi ànaayi ne mwandamukùlù ku dîbà dimwè? Ùdi wènda ùya lubilu lwà kilòmèetà mitwè ku binunu bibidi ne nkàmà yitaanu ne makumi àsambòmbò ku dîbà dimwè mpindyewu. Kacya kanùtukù buumvwe maalu à mamanya àtèèja kàbidi muntu awu nànsha. Ùvwa mwabilemù mu ditùkù dyèndè adi, kàdi bàdi ne mwoyi mu ditùkù dikwàbò. Ncyà bushùwà.

115 Kàdi, twètù bayiishi, kaa, to. “Dyondopa dyà kùdi Nzambi? Mpindyewu ngánjì mmonèbi cìvwà—cìvwà Munsantu Moody, Finney, Knox, Calvin, bàmwè bàà kùdibo bàmbè bwà Cyòci aci.” Bàvwa bambilemù mu matùkù àbò awu. Kàdi tudi tùtungunuka, twenda tuya kumpàla. Tudi ne cintu kampànda cikwàbò.

116 Yesù wákamba, mu lusumwinu amu, lwà mummyaminyi alu, pàakapàtukà mummyaminyi ne kumyaminayè. Ne àmwè. . . Mwena lukunà wàkalwa pabwìpi ne kumyaminayè bisonà kampànda bibi mu blé amu. Yèyè kwamba ne: “Bilekèlaayi bikolelè pàmwè.”

117 Wèwè utu misangu yònsò ànu ufunkuna mùdi bàà pa buloba bènda bàbiipa, kàdi upanga kumòna mùdi Èkèleeziyà wènda ùshààla ne bukolè, ànu dîbà dimwèdimwè adi. Ùdi munkaci mwà kujuuka, mwimanè mu budimi bwà bwambi. Kaa, Yèyè's nkasumbù kakesè kàà mikòkò, kàdi, mwanèètù, Nzambi ùdi Nendè. Ne Yèyè neàcimùne cyà bushùwà ànu mùvwà Kilistò mubiike ku bafwè amu. Amen. Èkèleeziyà wa Nzambi kàadyàkupangilakù to. “Biibi byà ifernò kabyàkuMutàmba bukolè to.” Bileeja ne nebàMulwishè, kàdi kabàkumutàmba bukolè to. Èkèleeziyà neàcimùne, ku Mashì à Yesù Kilistò, ne lwendu lwà bucimunyi. Ndi mutwishiiibwe bwà cintu cimwèpelè eci ne, Nzambi neikalè ne Èkèleeziyà kàyi katobà, mufudi, anyi kalèmà. Amen. Ndi ne disànkà dyàbúngi bwà bwalu abu.

118 “Mpindyewu, piikalàbi ne mèmè ndi mu Èkèleeziyà awu, amen! Mwanèètù Branham, udi ubwelaMù bishi? Ku mukànda mukufùndila anyi?”

To.

“Udi ubwelaMù bishi?”

Ku Dilediibwa, mulediibwaMù!

119 Ndi mu dîkù dyà ba-Branhams, nebiiikale bidimu makumi ànaayi ne bitaanu, mu ditùkù diisambòmbò dyà ngondo wa

cisanga-nkàsù ulwàlwa ewu, ne kacya kabàvwakù bandòmbe bwà mèmè kuya kashààla wa mu dikù dyàbò to. Ntu mulediibwe Branham. Nèngiikalè misangu yònsò ànu Branham.

<sup>120</sup> Mvwa mulediibwe mwena Kilstò, mu Yesù Kilstò. Nèngiikalè mwena Kilstò, bwalu Nzambì mmucilongòlòle nànkù, ku disungula. Yèyè wàkatubiikila, ku ngàsà wa Mwán'Endè Umwèpelè munanga. Tudi baMwitàbe ne tudi ne Mwoyi wà Cyendèlèlè. “Ku dilabulangana dyà ku cyanza anyi?” “Ku buumambala kampànda anyi?” “Ku mukàndà mufùnda kampànda anyi?” “Ku Nyumà umwèpelè nkutùdi bònsò babàtijiibwe mu Mubidi wùmwèpelè, Yesù Kilstò,” ne mwòmò amu tulwa beena mwàbò bàà Bukalenge.

<sup>121</sup> Mvwa ngèèla meeji leelù ewu, pàmvwà muyè kasambila, mùshindù ùdibi ne ditùkù edi ki ditwikala ne cyà kulumbulula bwàdi. Mèmè ncyà kulumbulula bwà lukòngò lùvwà kumpàlà kwànyì nànsha, anyì bwà lukòngò lwàlwa paanyimà pàanyì to. Kàdi, ku Cilumbulwidi, nebikèngelè ngiimanè ne lukòngò elu. Ki mèmè kwamba ne: “Tàngilà kwàka, fòtò wa mukàji kampànda pa cimanyinu, dinwà dyà maala à bière, cintu kampànda cikwàbò, kwambayè ne ‘kàvwa ne mweyelu to’ anyì cintu kampànda.” Mèmè kwamba ne: “Èyowà, ne kàyì ne Mwoyi to, kàbidi.” Èyo. Ki bwalu mbwòbù abu's. Mèmè ne: “Bundù kaayi's wè!”

<sup>122</sup> “Ne diyiiisha dyònsò edi,” mungàakambà, “misangu mikwàbò mbimwèke ànu bu nè,” mèmè kwambila mukàjàànyì, kwamba ne: “misangu mikwàbò mbimwèke ànu bu nè kabyèna ne dikwàcisha nànsha dikesè to. Kàdi bìdi bikèngela bwà mèmè kwikala diyì dyà didimwija, nànsha bishi, cidi bantu bènza nànsha ciikàle cinyì. Bìdi bikèngela bwà mèmè kuyiisha Èvànjeeliyò, nànsha bishi, ne kufila bujaadiki bwà dibiiikà dyà ku lufù ne Bukolè bwà Yesù Kilstò.” BàBùlekèlè, ne bàkomeku nyimà; Nzambì neàbàlumbulwishè ku Cilumbulwidi bwà bwalu abu. Mèmè ndi mwambule bujitu ànu bwà kuyiisha, ne bambi bakwàbò kàbidi, bàdi bàyiishà Èvànjeeliyò abu.

<sup>123</sup> Mpindyewu, mèmè ndi ànu muCinangè. Mònaayi ne: “Ndàayi kumpàla mpindyewu,” nènku nenùmonè butùmbì bwà Nzambì. Kàdi, tèèlejàayi, mvensà wa 16 mpindyewu. Tudi tubala nùnkù.

*Kàdi juulà . . . dikombo adi muulu, . . .*

<sup>124</sup> “Dikombo,” ki dìvwà dikombo dyà cilumbulwidi ndyòdi adi. Mpindyewu, kacìvwa dikombo dyà Mòsà to. Aciì cìvwa dikombo dyà Nzambì. Bu nwènù mwà kumòna, Mòsà, yèyè wàkangata dikombo adi, kudikwàtayè dyela muulu mùshindù ewu, nkùpà kupàtukayi. Wàkadilamina pamutù pàà màyi awu, kwandamukawù mashi. Cìvwa ndikombo dyà cilumbulwidi cyà Nzambì. Nènku dikombo dimwèdimwè adi . . . Nwacyùmù's! Dikombo dimwèdimwè adi ke dyàkatuutàyè naadi lubwebwe

alu; ki mutanta kwedibwawù mu luseke lwà lubwebwe amu, ke mâyi kupâtukawù mu lubwebwe amu.

<sup>125</sup> Mpindiyewu, lubwebwe alu lùvwa n’Kilistò, ne cìvwa ncilumbulwidi cyà Nzambì. “Ditùkù diwàkùdyà, ditùkù adi ndiwàfwà.” Kutuutàbò Kilistò ku Kàlvaryò, kufutayè lufù lwà bululu menemene, lwà ùpunga naalù. Muntu nànsha umwe, kàvwakù mwà kuumvwija cìvwa bwalu to, anyi kàadyàkumvwijakù to. Mwaba awu Nzambì wàkatèeka cilumbulwidi cyònsò cyà Nzambì pambidi Pèndè, ne kuMutuuta mu lubadi, pàakapàtukà mu lubadi Lwèndè mâyi ne Mashì ne Nyumà, bwà bupikudi bwètù.

<sup>126</sup> Mùshindù mwinè wùdi bantu bàzòla cimfwànyì Cyèndè, mîngà misangu, mwikàle ne mùzàbì muMujìngila, anyi cintu kampànda cikwàbò, pa nkùrusè. Kabyèna nànkù to. Bàkaadija Muntu awu, mu bupâlè bwònsò, cintu cyà busenji cìvwa bò mwà kwenza aci; kàdi Yèyè ùvwa ne cyà kupicilaku. Ki Yèyè awu, mutàmbe kutùmbuka ne mwenji wa maalu mùdìwu ku bònsò bàà pa buloba, ùvwa kacya kàyikù anyi wikala kàyiku nànsha. Ne pashìshe kwadijibwayè, butakà, pa nkùrusè; mutàpìlbe mpùtà, mutuuta, ùzònta mashì; makòdi à tuseku mamutwìla malembèlèle mumpàlà Mwèndè; cifulu cyà butùmbì cyà mèbà ku mutù Kwèndè. Kàdi’s ki pàakacìmunàYe lufù, ifernò, mpèkaatù, mabèedi, ne lukità, ne kutùfucila bònsò mushinga apu.

<sup>127</sup> Bàtu bàmbè pa ciibidilu ne, misangu mikwàbò ne: “Ki mwaba wàkanyèngelàYe kalonda kàà lufù ngwòwò awu.” Ke mwaba wùdi Pòlò mwàmbè ne: “Wèwè lufù, kalonda kèèbè kàdi penyì?”

<sup>128</sup> Bàtu bandondèle ne bìshì byàbùngì, mbùlùbùlù ne bikwàbò, bìdi ne kalonda, ne kàdi ne lulengu, mwómò amu. Kàdi musangu ànu ùmwèpelè ùdìbì bisùma, bìdi bìjimija kalonda kààbì aku.

<sup>129</sup> Lufù lùvwa ne kalonda mu lwólù, musangu kampànda; kàdi Kilistò, ku Kàlvaryò, wàkapàtula kalonda kàà lufù aku. Àlèluuyàh! Kaa, pàndì nkwèlela meeji’s wè! Kuntwaku Yèyè kupàtula kalonda aku mu lufù, bwànyì mèmè ne wèwè, kalonda kwònsò kàà lufù aku.

<sup>130</sup> Pòlò mmwàmbè, pàvwàbo ne cyà kumukòsa mutù, mu bùlokò bwà beena Loomò, yèyè kwamba ne: “Lufù, kalonda kèèbè keepi?” Kufunkunayè ku Kàlvaryò, ne kwòko aku ke kwàkajomonyiibwa kalonda aku mu lufù. “Lukità, bucìmunyi bwèbè bùdi penyì?” Yèyè ne: “Kàdi twasàkidila kùdi Nzambì, udi utùpèèshila bucìmunyi ku Mukalenge wetù Yesù Kilistò.” Amen. Èyo.

...adi dikombo (cilumbulwidi), ne kudyòlolayè. . .  
kubwikila m—mbù, ne kumpupandulula: ne bàna bàà  
Izàlèlèlà nebàsabukilè dyàmwàmwa pa buloba bùme  
munkacìnkacì mwà mbù.

*Nènku mémè, mònaayi, nêmpapishè mwoyi wà beena Èjiiipìtu, ne bóbò nebàkulondè: ne nêndyângacilè luumù pa Pâlò, ne pa cilwilu cyèndè cyònsò, ne pa màkalù èndè à mvità, ne pa babàndi bàà pa tùbalù.*

*Nènku beena Èjiiipìtu nebàmanyè ne mémè ndi MUKALENGE, ne mémè ndi mudipetèle luumù pa Pâlò, ne pa màkalù èndè à mvità, ne pa babàndi bèndè bàà pa tùbalù.*

*Nènku mwanjèlo wa Nzambi, . . .*

<sup>131</sup> Tèèlejàayi! Swikaayi mukàbà bikolè mpindyewu. “Ne Mwanjèlò wa Nzambi, wákaya kumpàlà kwà citùùdilu cyà Izàlèèlà awu,” Yèyè ùcidi ànu kaaba aka.

*. . . mwanjèlò wa Nzambi, wákaya kumpàlà kwà citùùdilu cyà Izàlèèlà awu, wàkuumuka ne wákaya lwà paanyimà pààbò; ne dikunji dyà ditutu adi kuumukadi kumpàlà kwàbò, ne kwimanadi paanyimà pààbò: (anyì, dyàkabànda kuumuka apa, kwimanadi lwà paanyimà apa; ne kudyèladi pankaci mu cikondo cyà lutàtu.)*

<sup>132</sup> Pàdi lutàtu lùbanga kukùngamangana neebè, bubèèdi ku nseke yònsò, lutàtu, Mwanjèlò wa Nzambi ùdi ùjuuka, ùdyèla pankaci pèèbè ne bubèèdi, ne wimana mwaba awu mu njila, ùkwela kadyòmbò bwà wàngatè Diyì dyà Nzambi.

<sup>133</sup> Nzambi ùvwa mupèèshe Izàlèèlà mulayi awu ne, nebàbwelè mu buloba abu. Kùvwa pàmwàpa, mùliyó mujimà wà bantu, bènda bàlwa, bwà kubàdimbata ne kubàbucikila, ne kubàzèzela panshì, bu mùdi musumbà wa nyama amu. Kàdi Mwanjèlò wa Mukalenge, Ùvwa mwaba awu bwà kuya naabò ne ku buloba bulaya awu, kujuukayè mu citùdilu amu kuyayè e kwimana pankaci pààbò ne njìwù.

<sup>134</sup> Àlèluuyàh! Yèyè ùcidi ànu ùcyènza. Yèyè neàsebè njila. Kaa, mémè ndi ànu muMunangè bwà cyòci aci’s, kàdi nwènù? Yèyè neàsebè njila bwà mubèèdi yònsò udi musòmbè kaaba aka mpindyewu mene. Yèyè ukaadi mumane kuseba njila, ne Yèyè mmwimàne pankaci pèèbè ne lutàtu.

<sup>135</sup> Ne ndi mumanyè ne Yèyè ùdi kaaba aka mpindyewu mene. Udi mwà kumbiikila bu mukoleshi wa maalu pawikalà muswè; Ncyèna mwambule bujitu bwà cyùdi wamba to. Kàdi ndi mwambule bujitu bwà bìndi ngàmba, kumpàlà kwà Nzambi. Kàdi Yèyè Wàkalombola bàna bàà Izàlèèlà awu, piikalàbi ne ndi mucijingulule mu mùshindù mujaalàme, pa Bukènkè bunùdi numòna dilòòlò edi abu, anyì bamòne pa fòtò awu. Ngèèla meeji ne mbayipàtùle dilòòlò edi. Mwanjèlò wa Nzambi umweumwe awu ùdi mu nzùbu emu mpindyewu mene, bwà kwenza ànu menemene cyàkenzà Yesù mu ditùkù adi aci, Yèyè ùdi kaaba aka bwà kushìndika, ànu cyàkenzàYe musangu awu aci, ki cidìYe mpindyewu, ne neikalè misangu yònsò ànu umweumwe awu.

Mwanjèlò wa Nzambi, ùbànda bwà kwimana pankaci pèètù ne màsaamà, mwimàne pankaci pèètù ne lufù.

<sup>136</sup> Kabyèna bikèmesha to pàakambà Davidi ne: “Èyowà, nànsha mèmè mupicile mu bibandabanda byà mundidimbì wà lufù, ncyàkuciina cintu cibi nànsha cimwè to, bwalu Wèwè udi naanyi.” Bushùwà.

<sup>137</sup> Mwimàne mwaba awu, Mwanjèlò wa Nzambi wàkaya kumpàlà kwà citùùdilu cyà Izalèèlà, ne kuumukayè, e kuya kiimana pankaci pààbò ne mwena lukunà.

<sup>138</sup> Nèngu Mwanjèlò wa Nzambi mmwimàne, dilòòlò edi, pankaci pàà muntu-nkààyà yònsò ewu ne mwena lukunà. Ndi mumanye cìndi munkaci mwà kwamba aci. Ndi mumanyè ne, pàndi mwimàne kaaba aka mpindyewu pa cibumbà cyà ku cyambilu apa, kumpàlà kwà kasumbù kakesè kàà bantu aka dilòòlò edi, ndi mumanyè ne Nzambi ùkaadi mudipwekeshe milongo, upweka ùfùmina mu Butumbi, ne mwimàne mu nzùbu ewu mpindyewu. Bu wèwè ànu mwà kudìdinga kupàtukila pa Dìyì dyà Nzambi, kumòna Yèyè ní kèna ùtentemuka kumpàlà kwèbè. Tàngilàayi.

<sup>139</sup> Ne Dyàkalwa pankaci pàà citùùdilu ne beena Èjiiipitù. Yèyè neàlwe pankaci pèèbè ne bubèedi bwèbè abu. Yèyè mmwimàne pankaci pèèbè ne mpèkaatù yèbè, patùdi twakula apa mene. Bwà cinyì? Tudi mu cimwàngi cyà Èkèleeziyà. Èjiiipitù ùvwa misangu yònsò ànu ùbìikidiibwa ne mbuloba, ne pàakapàtukà Izalèèlà mu... Vùlukaayi ne, bàvwa bidimba byà èkèleeziyà kuntwaku. Kàdi paanyimà pàà mashi ne difuta dyà cibawu bimanè kwenjiibwa, bàakalwa batengùdiibwe bàà Nzambi.

<sup>140</sup> Ne ditengudiibwa, leelù ewu, ndibàtiiza dyà Nyumà Mwimpè. “Bònsò,” mwàkambà Stèfanò, “nwènù bònsò bàdi kabàyi batengula mu myoyi ne mu maci aba, nudi misangu yònsò ànu nukàndameena Nyumà Mwimpè bwà cinyì? Mwàkenzà baatatwènù amu, s’ke munùdi nwenza pèènù.” Nyumà Mwimpè kutengùlayè mu mwoyi, kukòsa kuumusha bintu byà pa buloba. Ke mùvwà èkèleeziyà wa cijila wa kale awu wènda pa ciibidilu, wènza maalu nàngu, ùsòmba nàngu awu. Kàdi, leelù ewu, bidi ànu mùdi bakwàbò bàà pa buloba amu. Bidi bundù. Tudi bashiye biibi bwàshì.

<sup>141</sup> Mwanèètù mukùlumpè Spurgeon ùvwa ne ciibidilu cyà kwamba, mulunda wanyi muyiishi mukùlakàji wa ba-Méthodistes, ùvwa ne ciibidilu cyà kwimba musambu ne:

Tukàadi bashiye biibi bwàshì, tukàadi bashiye  
biibi bwàshì,  
Tudi badyè cibàngà ne mpèkaatù.  
Tukàadi bashiye biibi bwàshì, mìkòòkò  
mmipàtùke,  
Mbujì yàbwèdi bìshi’s?

142 Mbwalu nudi bashiye biibi bwàshi! Ki cyôci. Nudi balekele cipiminu cyà nsòmbelu wa bwena Kilistò, bwalu masèminère mmatooye ndambù wa bayiishi ne mmabatùma bwà kudyàbo cibàngà pa bidì bitàngila Bulelèlà. Kàdi Nyumà Mwímpè ùtu misangu yònsò ànukù bwà kupiisha mpèkaatù, ne ùdi dilòòlò edi mwimàne pankacì pàà mwena kwitabuuja ne bintu byà pa buloba. Amen.

*Nènku dyàkalwa pankacì pàà citiùdilu ne beena Èjiipitù ne citiùdilu cyà Izalèèlà; ne òwà ditutu dyà midimà kùdìbo, kàdi òwà difila bukènkè bufùkù kùdì aba: bwà ewu kàsemenyi pabwipi ne mukwàbò butùkù bujimà abu to.*

143 Tàngilàayi, cintu cimwècimwè cyàkapèèbwà kasumbù kàà beena kwitabuuja aka, Bukènkè, bùvwa bubàfomija.

144 Èyo, lwàtaayi nkooi yènu ya dikàndameena naayi bisuusù ayi. Ki cyôci cilwalwà eci. Tàngilàayi, muntu yònsò udi ubènga Bukènkè awu ùdi ùlwa mpofo ne ùkabwela mu midimà bwalu kwènà witaba Bukènkè to. Amen. Nzambi ùdi ùtùma bambi bàdi bàyiisha Èvànjeeliyò. Yèyè ùtu ùtùma bimanyinu ne maalu à kukèma munkacì mwà bantu, bwà kushindika ne Ùdi Bulelèlà; kàdi bantu bàBùbènga, kì nkushàale cintu nànsha cimwè to ànu midimà bwèbè wèwè. Endèlà mu Bukènkè pàcidi Bukènkè bùkenkesha apu, mwanètù wa balùme. Akidilàku Bukènkè. Kilistò ke Bukènkè. Yèyè mmulwè bwà kukutwàdila Bukènkè. Kàdi aba bàakabènga Bukènkè abu bàakapeta midimà. Nènku mulùme yònsò ne mukàji, dilòòlò edi, udi ubènga Bukènkè awu, ùdi wèndela mu midimà, kàyi mumanyè kùyaayàye to. Ùdi ùtetuka ànu byètù byà menemene ebi, mumanyike kùdì bantu, kàdi ndi ndikonka cidìye mu Bwikadi bwà Nzambi.

145 Mònaayi nànkù! Cintu cilenga kaayipu kaaba aka's wè! Yèyè ùvwa Bukènkè kùdì muntu, ne midimà kùdì mukwàbò. Beena Izalèèlà, dìbà adi, paanyimà pàà Mòsà mumanè kusambila, bàvwa mwà kulàala panshi mu ditalala. Mpindyewu tàngilàayi.

*Ki Mòsà kwolola cyanza cyèndè pamutù pàà mbù; ki MUKALENGE kwenzayè bwà ne mbù adisakè paanyimà ku cipepèlè cicolè cyà ku esètè bufùku bujimà abu, ne kuwija mbù buloba bùme, ne màyi àkakòsoloka.*

*Nènku bânà àà Izalèèlà bàakabwela munkacì mwà mbù pa buloba bùme, . . .*

146 Bu nwènù mwà kumòna, pàvwà bânà bàà Izalèèlà, bàvwa bapàtùke mu midimà ne biitàbe Bukènkè abu, pàakabwelàbo mu lutàtu, Bukènkè bwàkaalukila cyànyimà. Ne bàakalàala tulù bufùkù bujimà. Ne pàvwàbo munkacì mwà tulù apu, Nzambi ùvwa munkacì mwà kutùma cipepèlè, cipepèpula panshi pàà mbù apu, cyènda cikàngula njila wa kupàndukilabò.

147 Àlèluuyàh kùdì Mwànà wa mùkòòkò! Ndi ne disànkà dyàbùngì dyà ne ndi muujiibwe tètè ne Nyumà Mwímpè, dilòòlò

edi. Patùcìdì balààle tulù apa, twenda tucyònkomoka, biikishile mu mulayi wà Nzambi's!

<sup>148</sup> Nzambi mmubàlayè, bwà kubàsebela njila wa dipàndukila. Nènku pàvwàbo biikishile pa mulayi ewu, Nzambi ùvwa kuntwaku, kumpàlà kwàbò, wènda ùbàkàngwila njila.

<sup>149</sup> Mulùme yònsò ne mukàjì yònsò, dilòlò edi, wíkala mwà kwitaba Yesù Kilistò pa byòbì bishimikidi abi; Nyumà Mwímpè, paùdì mulààle tulù, paùdì mwikishile mu mulayi Wèndè apu. Pàmwápa wèwè udi cikalàbà; pàmwápa udi mpofo; pàmwápa kwèna mwà kuumvwa to; pàmwápa kwèna mwà kumòna to; pàmwápa wèwè udi usaama; disaamà dyà mwoyi, kànsèrè, anyi cintu kampànda, mwikàle upùnga ne lufù. Itàbà Bukènkè, dilòlò edi, ne ikishilàPu.

<sup>150</sup> Ne lupeepèlè, lùlwa bu cipeepèlè cicolè cyà civuma mu Ditùkù dyà Mpenta, nelùye lutàngile kuntu kwàka ne lùkàngula njila bwèbè wèwè, àlèluuyàh, bwà wèwè kupicila ànu mu cibandabanda cyà disaamà aci, kwalukila buludi mu buloba bwà bukolè bwà mubidi. Neùpicile ànu mu buloba bwà mashika abu, bwà maalu à kwìsùkwìsù, malamakaja à ntèndeleeleu, yidì kayiyi yicyùka maalu ayi; kuya ku mwoyi mùle tètè ne Nyumà Mwímpè, ne disànka, wenda ùcyònkomoka, mùle tètè ne disànka.

<sup>151</sup> Nzambi ùdi ùleeja bukolè Bwèndè, ne ùvwa munkaci mwà kubùleeja. Mfwilaayikù luse, ndi ntàmba kwakula ne dīyì dikolà be. Ndeejja bupikudi ku bukoplè. Kuleejayè mashi paanyimà pààpa, pa cintu cimwèpelè. KuleejaYè bukolè Bwèndè apa, ku Mashi Èndè, ku bupikudi. Kuleejayè bukolè Bwèndè bwà kupàndukabù ku lufù, ku mashi. Wàkaleeja bukolè Bwèndè bwà kwenza njila wa dipàndukila, ku bupikudi bwà bukolè.

<sup>152</sup> Nènku, leelù ewu, nwènu bàdì biitàbe, amen, nwènu bàdì biitàbe Mashi à Yesù Kilistò abu, bwà kunùkezulawù ku mpèkaatù, bukolè bwà Nyumà Mwímpè bùdi kaaba aka bwà kunùlombola ku dibàtiiza dyà Nyumà Mwímpè. Bukolè bwà Nzambi bùdi kaaba aka bwà kunùshintulula ku disaamà kuya ku bukolè bwà mubidi. Nzambi, ùtentemuka, mu cimwangì cyà Èkèleeziyà Wèndè! Ùdi ùbwela mu disampila, mwikalà Nzambi bwà kusangishila, paanyimà pàà katanci, lutete Lwèndè amu. Bilenga be, bàpàtuka mu mīdimà, bàbwela mu Bukènkè bulenga be! Mùshindù mwinè wutùdi banangè cyòci aci's wè! Mùshindù mwinè wùndi mucinange's wè! Cidì aci cyùmvwija mu musùkà wànyì, dilòlò edi's wè! Balundà bàànyì, nwènu. . .

<sup>153</sup> Mvwa ngàakula ne muntu kampànda leelù ewu, udi mufùme ku ditwilangana naanyì pàmvwà mupàtùke pambèlu apu. Ki yèyè kwamba ne: “Mvwa nteeta kwambila bantu.” Yèyè ne: “Nkaadi mushintuluke bukolè, Billy, kacya ànu paùcìvwà mwànà mukèsè.” Yèyè ne: “Wèwè uvwa ne ciibidilu cyà kulwa kungambila, pa kaaba kàànyì kàà mudimu, ne bìvwa



bikèngela bwà mèmè kuditéèka mu bulongàme ne Nzambì, Bivwa bikèngela mèmè kudilongolola ne Nzambì.” Ki yèyè ne: “Mvwa ngenza kukuseka mu mûshindù kampànda. Kàdi,” yèyè ne, “Billy, bintu mbishintùlùke mpindyewu.” Yèyè ne: “Ndi mumanyè mpindyewu cyùdi wamba.”

Mèmè kudiyambidila ne: “Nzambì àtumbè!”

<sup>154</sup> Yèyè ne: “Ndi nteeta kwambila bakwàbò bwalu abu,” ki yèyè ne: “bàdi bàshintululula cyena-bwalu aci ne bàtùngunuka ne kwakula pa bibèjibeji byà lukutukutu, anyi cintu kampànda. ‘Kaa, kî mmèmè to. Nsongàalùmè udi ulonda mu ditumba ewu, ùdi mwà kufwà, nyèyè udi ulonda. Pàmwàpa nombà wendè ngudi ulondela,’” kàdi kàyì mumanyè ne nnombà wa nganyì udi ulondela to. Ùdi mwà kwikala wèbè, dilòlò edi, wèwè mulundà wanyì. Eci cidi mwà kwikala cikondo cidi Nzambì ùkubiikila.

<sup>155</sup> Nzambì, Nyumà Mwîmpè munène awu, mwimàne kaaba aka dilòlò edi, pankaci pàa lufù ne Mwoyi; mwimàne kaaba aka dilòlò edi, pankaci pàa mabèedi ne bukòlè bwà mubidi. Ndi mumanyè cindi ngamba aci. Ncyà bushùwà. Mpindyewu mene, Nyumà Mwîmpè umweumwe ùdi umvwa mpindyewu awu, muntu yònsò mulediibwe cyàkàbìdi ùdi ne cyà kuumvwa Nyumà awu mu cibambalu emu. Kwèna mwà kupanga kuumvwa to. Wèwèku ne Mwoyi, udi mumanyè ne Wùdikù. Èyo.

<sup>156</sup> Mûshindù ùdici bu cyamù cyà nzembu, pàdici. . . Pàdi cyamù cinène cyà nzembu cyènda ciseemena pabwipi ne cyamù kanà cyònsò eci, cidi cibanga kunyunga ne cikòkiibwa, (bwà cinyi?) pàdici citàmba kuseemenakù. Cyenzè bu cyamù cinène cyà nzembu cyà cikòka bintu cipweka, lwà apa nunku, musangu kampànda, ku Hammond kwàka, mu Indiana. Mvwa mbandila mùvwàbò bàngula bisòtà byà cyamù, panshi apu. Bàvwa bàkòka mulonda munène; cyamù cinène cyà nzembu civwa cipweka panshi apu. Nènku bàvwa bàkòmba bisòtà byònsò lwà panshi apu. Nènku pàvwàci cipìcilapù apu, bisòtà byònsò bivwà bikòkiibwa ku nzembu yà cyamù cyà nzembu abi, cyamù cifiike, bivwa dyàkàmwe bibànda ne bya ku cyamù cyà nzembu aci, bina. Nènku bàvwa bàcilamuna ku nzembu, bacyèla mu cyes cinène, ne bàcifumbulula cyàkàbìdi. Kùvwa bisòtà byàbúngì byà aluminium bivwà bishààle. Mèmè kwamba ne: “Mbwa cinyi byòbì ebi kî mbiyè to?”

Yèyè kwamba ne: “Kabyèna bikòkiibwa ku nzembu yà cyamù cyà nzembu to.”

<sup>157</sup> Mèmè ne: “Nzambì àtumbè.” Mèmè kwamba ne: “Bwà cinyi ebi kî mbiyè, lwà kwinshi eku, katùpà kàa cyamù cifiike aka?”

Kwambayè ne: “Wèwè mutàngile bìmpè, ncilamika panshi.”

<sup>158</sup> Nènku aci cidi bu mùdi bantu bààbúngì dilòlò edi, balundà bàanyi. Wèwè ukàadi mulwè cidimba cyà èkèleeziyà, kàdi kuyi ukòkiibwa kùdi dibàtiiza dyà Nyumà Mwîmpè to. Pashiishe

ulekela cintu kampànda cikulamina panshi, dishiilangana kampànda, ndikulamine panshi.

<sup>159</sup> Kàdi òmòwè dyà ku matùkù àdi panshi aa, kùdi cyamù cinène cyà nzembu cidì cifùminà ku Esètè, cibiikidiibwa ne m'Mwànà wa Nzambì, ciikalà mwà kukòmba mu buloba ebu. Ne muntu yònsò udi mufwè mu Kilistò neabiikè ku lufù pàmwè Nendè, bwà kuya dyàmwàmwa. Ne mibidi yà kale eyi neyishintulukè ne yìvwijiibwe mifwànangana Nendè, ne mubidi Wèndè Sungasunga wà butùmbi awu, mutwikalàku ne mwoyi bwà kashidi ne kashidi, basùlùdiibwe ku mabèèdi, basùlùdiibwe ku bukùlákàje, basùlùdiibwe ku bintu bikwàbò byònsò; ne mu Butùmbi bwà Nzambì, bwà kwikala ne mwoyi mu Bwikadi Bwèndè bubènesha bwà kashidi. Amen. Aci kacinwènjiku bwòwà nànsha. Ndi ndyùmva butèndeledi bwàmbwedi mpindyewu mene. Ncyà bushùwà ne mmwòmò's. Eyo.

<sup>160</sup> “Bwalu ndi mumanyè ne mupikudi wanyì ùdi ne mwoyi, ne ku matùkù à ndekeelu Yèyè neimanè pa buloba apa; nànsha misàndà yà mu dikòba mibùtùle mubidi ewu, nànsha nànkù mu musunya wànyì nèmmonè Nzambì; ungàdìmwènà ne àànyì àbìdi; mèsù àànyì neàtàngilè, kàdi kí mmukwàbò to.”

<sup>161</sup> Kanwèdi meeji ne ndi mupâlè to. Ncyènà mupâlè to. Ní ndi mupâlè, ndekèlààyi. Ndi mutàmbe kwikala ne disànka mu mùshindù ewu kutàmbe mùmva mu mungà mùshindù awu. Eyowà's, mukalenge. Ndekèlàayiku nshààle ànu mu mùshindù ewu. Kaa, bushùwà's, “mupâlè,” kùdi bàà pa buloba, bwalu, bintu bidì bàà pa buloba bàbìikila ne mbipâlè abi, Nzambì ùdi ùbìbìikila ne mbibènèshìibwe. Bikèngela wèwè “kujimija lungènyi lwèbè,” kùdi bàà pa buloba ebu, bwalu (bwà cinyi?) kwèna wa pa buloba ebu to.

<sup>162</sup> Panùdi nusambuka mushoonyi wà mukàlù awu, nudi nulwa beena-mwàbò bàà mu Bukalenge bwà Nzambì. Kaa, ekèlekèlè! Mmunyì mùdìbi bìmpè? Mòna's, wèwè udi ulwa cifùkiibwa cipyacipyà, (kaa, ekèlekèlè) mushintùlùke muumùke ku cyùdi mpindyewu eci. “Nudi mpindyewu bânà bàà Nzambì. Mpindyewu tudi basòmbe pàmwè mu myaba yà mu Dyulu.” Kabìyi ne, “netwikalè,” mu Bukalenge bwà bidimu cinunu to. Tudi mpindyewu, mpindyewu mene tudi bânà bàà Nzambì. “Mpindyewu mene tudi basòmbe pàmwè mu myaba yà mu Dyulu, mu Kilistò Yesù,” kí ng'ànu mu ekèleeziyà to, “mu Kilistò Yesù.”

<sup>163</sup> Mukalenge Yesù mubiike ku lufù awu ùdi kaaba aka. Yèyè ùdi kaaba aka mu bukòlè Bwèndè. Yèyè ùdi kaaba aka mu bukòlè Bwèndè bwà bupikudi. Yèyè ùdi kaaba aka bwà cimwangi. Yèyè ùdi kaaba aka bwà kubweja cidimba cyònsò cyà ekèleeziyà mu bwobùmwe Nendè. Yèyè ùdi kaaba aka bwà kutwàla ngènzàmpèkààtù yònsò, nànsha wèwè wa ciipanshi

bìshi, Yèyè ùdi kaaba aka bwà kubweja bukolè bwà dibìikà Dyèndè dyà ku lufù mu mwoyi webè ne kukuvwija cifùkiibwà cipyacìpyà.

<sup>164</sup> Mwaba'ewu, kùkaadi ndambù wa bidimu, ntèdeleelu yònsò yà pa buloba kutwilànganayi, ngèèla meeji ne mùvwa mmu Londres, mu Angletterre, anyi mu mwaba kampànda. Ncyèna ànu movùlùka menemene to. Kàdi, pàvwàbo bònsò bàakula bwà èkèleeziyà mishiilèshilàngàne, ba-Mùzùlùmanyi, ne beena Bouddha, ne bikwàbò byònsò, Kalùmyàna . . . muntu uvwa uleeja mpàla wa èkèleeziyà wa beena Cijila wa beena Àmèrikè, John Witt, ngèèla meeji ne, òvwa n'dìna dyèndè, nànkù pàakiimanàye kuulu, mu cikondo cyèndè cyà kwakula, ntèdeleelu yònsò milejejiibwe mpàla mu nsangilu ewu munène, kulondayè bwalu bwà Lady Maccabée, mùshindù ùvwàyè; mukwàciibwe mu Oklahoma, mwikàle ne cifwankà ku mishiku, wènda wèndesha màshinyi à . . . anyi ùyangakaja mikenji yà biteshi byà lubilu, ùpicila mu mìsèèsù ne kàshinyi kàà kakòkiibwe kùdi tubalù. Ùvwa mushipe bantu bàabùngi batàmbe, ne bukooyà bwàbùngi, ne bibi kàbiyi kumòna, mu mùshindù wà ne, pàydilàbo bwà kumwela kabùdimbù kumutwa masàlà pambidi, kabàvwa nànsha mwà kumulenga ne byanza byàbò to, bàvwa ne bwòwà bwà ne bàvwa mwà kukooyika.

<sup>165</sup> Nènku pàakalondaye bwalu ebu mu mùshindù wà bwalu bukolè awu, mu mùshindù wà ne batèèleji bònsò bàakashààla basòmbèle ku mibàngubangu yà nkwasà yàbò. Yèyè ne: “Nwènu balùmyàna, bàà ntèdeleelu yà buloba ebu, wènu ntèdeleelu ùdiku ne cintu cidì cifwànyine kusukula byanza byà Lady Maccabée awu anyi?” Muntu nànsha umwe kàakambakù dìyi to. Wàkatùpika kuya muulu kutuutakajayè bikànkanyi byèndè, kutuutakajayè byanza byèndè. Kwambayè ne: “Mashi à Yesù Kilistò kaàkukezula ànu byanza byèndè cyaààna to, kàdi Wòwò neàsukulè mwoyi wèndè.” Amen. Ncyà bushùwà.

<sup>166</sup> Mashi à Yesù Kilistò adi mwa kwangata ndumbà wa mutàmbe kushàadila mu Louisville, mu Kentucky emu, ne kumuvwija inàbànza, ne kumwenza yèyè awu munsantu. Adi mwa kupàtula kanwàyì mu mwaba wà kwìnshì kwàka, ne kumuvwija muntu wa nsongo, ne munsantu wa Nzambi.

<sup>167</sup> Balundà bàànyì, beena-mwàbò bàà Bukalenge, balùmè nàànyì bàà mu Kentucky ne mu Indiana, ne mu nyùngulukilu emu, kanwènaayikù nwela meeji, dilòlò edì ne, dìbà dikaadi dyàmba kukùmbàna dyà nwènu kutwà Mukalenge Yesù ewu mushinga, kumpàlà kwà mpùngà webè wa ndekeelu ewu kumushibwayè anyi?

<sup>168</sup> Pààbì, nudi numòna Èkèleeziyà ùya mu cimwangì cinène eci, numòna Dikunji dyà Kapyà dyènda dilombola kumpàlà kwètù; diimàne, dyènta bishimà ne bimanyinu. Yèyè ùdi kaaba aka, dilòlò edì, mu bukolè Bwèndè bwònsò bwà dipikula abu. Yèyè

ùdi kaaba aka bwà kusàngaja, ngènzàmpèkààtù yònsò, bwà kwaluja muntu yònsò udi mutwè cimpingà. Yèyè ùdi kaaba aka bwà kwondopa mubèèdi yònsò.

<sup>169</sup> Yèyè ki Èvànjeeliyò mu kaabujimà. Ne twètù tudi tuyiisha Èvànjeeliyò mu kaabujimà; tudyà Mwànà wa mùkòòkò mu kaabujimà. Mwoshaayi ne Nyumà Mwímpè, nùmanyè ne Yèyè ncyàkudyà cimpè, bwalu Nyumà Mwímpè mmutùbulwile ne n' Cimpè menemene. “Labùlà ne ùmonè, Mukalenge mmwímpè. Ùdi ne mwenya bu bwìcì mu lubwebwe amu.”

<sup>170</sup> Mukalenge Wetù Yesù ewu, mu dinanga Dyèndè ne bukolè, mu mabènesha Èndè manèné à bupikudi! Kaa, mùshindù mwinè wùdìYe mwimàné pankacì pàà èkèleeziyà ne mpèkaatù, dilòòlò edì's wè! Mùshindù mwinè wùdìYe mwimàné pankacì pèèbè ne cilumbulwidi's; ùzònzà mashi, ùsambila!

<sup>171</sup> Mùneemu emu ànu àbìdì àdì panshì aa, mèmè kubwela mu mwaba kampànda mu Ohio emu, kùmvwà ànu ne cyà kufila wanyì mmwènenu bwà cilumbulwidi. Mvwa munkacì mwà kudiilà ku nzùbu mukesè wa cidìilu wa Dunkard. Tuvwa twenza disangisha dinèné. Bìvwa bikèngela mèmè kushààla ntàntà wa kilòmeètà yàbùngì pambèlù pàà ditùnga, ku nzùbu kampànda wa cilààla-beenyì wa kulaminamù mashingyì. Mvwa munkacì mwà kudiilà ku nzùbu wa cidìilu wa Dunkard; bantu balenga bàà dikèma, kàdì mu dyàlumingu amu bàvwa bàkàngè bàyè mu èkèleeziyà. Bìvwa bikèngela nye ku mwaba kampànda mukesè, wà ciibidilu, wà cyena Àmèrikè bwà kudyà cyàkudyà cyànyì cyà mundaamuunyà.

<sup>172</sup> Pangààkabwelà mu ciibi, mèmè e kubazuka, kùvwa mpùlushì wa ditùnga mwimàné mwaba awu ne mabòkò èndè majìngila nsongààkàjì, ùnàya manàyi à mfranga ku cyamù. Mpindyewu manàyi à mfranga mmakàndikiibwe kùdì mikenji yà mu Ohio, kàdì mwaba awu muntu wa mikenji mene nyèyè awu munkacì mwà kushipa mikenji. Ne pàmwàpa, muntu wa bukolè bwànyì ebu, pàmwàpa musèlàngàné, mwikàle ne dikù mwaba kampànda; ne mabòkò èndè majìngila inàbànzà kampànda mutekète mwimàné mwaba awu.

<sup>173</sup> Mèmè kutuma mèsù paanyimà ku nzùbu wa cidìilu awu, nsongàalùmè kampànda misòmbe paanyimà apu, mikwàcìke maala, ne inàbànzà mutekète kàyì wènza maalu àà dimanya dyà nsòmbelu nànsha kakesè to.

<sup>174</sup> Ki mèmè kutàngila, musòmbe lwà panshì apu, ku luseke lwànyì lwà dyàbalùmè, ku kazùbu kampànda, piinè apu, nkààvwa ne nsòmbele panshì, mwaba awu bàvwa basòmbe pù kùdì inàbànzà mukùlumpè, wa bidimu bitwè ku makùmi àtaanu ne mwandamukùlù, makùmi àsambòmbò, wa bukolè bwà mààmù mundedi; musòmbe mwaba awu, minyèngù mubidi mujimà, tulàmbà tukèsè twìpì twela pa mbidi. Kàdì, kaa, cìvwa bwalu bukolè. Ne nzàdì yà ku bàna bèndè bàà nkàsà milaaba

yinè mukùnze, mishikù yèndè milaaba kapenta kakùnze, cintu cyà citàmba kumwèka cyènza bwôwà cyúkaadiku mumòne. Nsuki yèndè mikòsa miipidija menemene ne mipwekèle mu mpàla mùshindù *awu*. Wa bwalu awu munkaci mwà kunwà maalà.

<sup>175</sup> Mwaba awu basòmbepù nendè kùdì balùmè bàbidì, basòmba mwaba awu, mmwènekeli wa wènza bwôwà, bakwàcike, ne umwe wa kùdìbo mulààle mucyàmàkàne pa màlòngà à ku mèèsà. Nè dìbà dyàlòmbùbù luse, ne kuya ku kumba. . .

<sup>176</sup> Mémè kwimana mwaba awu. Mémè kudyàmbidila ne: “Éyì Nzambì wa yààyà, Udikù mwà kucitwàla munyi? Mmunyi mŪdikù mwà kutàngila byà mùshindù awu? Pìinè apu, nànsha mu mwoyi wànyì, pàànyì mubì mündì emu, nànsha nànkù, mvwa ànu munkaci mwà kudìkonka bwà ne Sarah ne Rebekah bàànyì batekète aba ní bààkolèla mu lukòngò elu bwà kumòna cyòci aci cyènzeka. Mukalenge, bwà cinyì Kùyikù ànu ucikùpula pa buloba apa?” Mémè kudyàmbidila ne: “Bwà cinyì Wèwè kwèna ànu ucyènza, Mukalenge?”

<sup>177</sup> Mémè kusòmba mwaba awu kàdì kubanga ànu kudila mwadi. Mémè kumòna cikèèna-kumòna. Mémè kumòna, cyenze bu, buloba bwikàle bunyungulukila mu lupeepèlè, ne mwanzankòngòlò kwimanawù mu nyungulukilu wa buloba bujimà amu. Ke muntu kampànda uvwa wakula naanyì, kwambayè ne: “Ke Mashi à Yesù Kilistò ngòwò awu, pa buloba bujimà, adi àMupangisha bwà kubùbùtulayè. Bu Nzambì mwà kumòna mpèkaatù: ‘Ditùkù diwàcidya, ditùkù adi ndiwàfwà.’ Muntu ne muntu mwinshì mwà Mashi awu, udi ne. . . ùdi ne budishikaminyi bwà disungula, bwà wèwè kwenza disungula dyèbè. Kàdì wèwè mufwè, ne musuùkà wèbè ùlèlema dyàmwàmwà dyà ngàsà wa Mashi awu, wèwè ukààdi mumanè kulumbulwishiiwà kumpàlà kwà kufika kwòkù aku. Kakwèna cintu nànsha cimwè cìdì cikushàadile to.”

<sup>178</sup> Dìbà adi mémè nkààyanyì kudimòna. Ngàkamòna Mukalenge wanyì Yesù mwimàne mwaba awu, ne cifulu cyà mèbà ku mutù Wèndè, ne binsònji bipweka, bisambàkàne ne mashi, pàvwàbi byènda bipwekela ku mwedi Wèndè apu. Ke mémè kumòna mpèkaatù yànyì yilwa kumpàlà Kwèndè, ne musangu wònsò wùvwàyi mwà kulwa kumpàlà Kwèndè mùshindù ewu, [Katùpà kàà mukàbà wà méyì munda mutupù—Muf.] . . . too ne pàvwàYe ùzakala. Mèbà àvwa mwà kushààla makwàte mu makikì Èndè, mapite búngì. Úvwa mwà kutètuka cyànyimà. Úvwa mwà kwamba ne: “Taatù, mufwilèku luse, kí mmumanyè cidìye wènza aci to.” Ne kàbìdì mvwa mwà kwenza cintu kampànda, ne pashiishe Mashi Èndè àvwa bu cikàndiki cyà ku kàshinyì, citù cikùba kàshinyì aci, àshààla ngabu kùndì ku cijji cyà Nzambì, nciji mukùmbànyine nànsha.

<sup>179</sup> Ki mémè kulwa kudiYe, bitekètebitekète, kutwà binù

kùdiYe. Mémè kwamba ne . . . Kwinyika mèsù panshi kuntwaku, kumpàlà kwànyì aku kùvwa kutèeka, mukàndà wà kale wà mpèkaatù, ne dìnà dyànyì difùnda lwà kumutù aku. Mémè kwamba ne: “Mukalenge, Udikù mwà kumfwila luse anyì?”

<sup>180</sup> “Cyà bushùwà,” mwàkambàYe, ne mèsù à dinanga; kwololayè cyanza mu lubadi Lwèndè, kupatula ndambù wa Mashi, ne kufùndapù ne: “Mufwidìibwe luse.” Ki kuwimanshayè mu Mbù wa Cipwàmwòyì. Kwambayè ne: “Mpindyewu . . .”

Mémè kwamba ne: “Twasàkidila, Mukalenge.”

<sup>181</sup> Yèyè kwamba ne: “Mpindyewu, Mémè ndi nkufwila luse; kàdi wèwè udi munkaci mwà kumupiisha.” Kaa, aci’s cyàkashintulula cimfwànyì, bwànyì mémè.

<sup>182</sup> Mémè—mémè kupàtuka mu cyòci aci. Mémè kuya kuntwaku kusòmba ku luseke kwà mukàji awu aku, ne kubanga kuyiikila. Nènku ùvwaku ne nsòmbelu wa mabika ne mala kumpàlà kwèndè. Mémè ne: “Kacya kùvwakù mwena Kilistò anyì?”

Yèyè ne: “Ndi mukolèshìibwe mu dīkù dyà beena Kilistò.”

Ki mémè ne: “Cidi cyenzèke ncinyì?”

<sup>183</sup> Kungambilayè bwà dibènga kupetangana ne bàyèndè, ne mùshindù ùvwà bàna, ne bikwàbò. Mémè ne: “Èyo, munda mwà bidimu byònsò ebi, kacya kùtukù mwanji kwikala ne nsòmbelu wa ditalala kacya wàtwilangana ne Nzambi anyì?”

Yèyè ne: “Mukalenge, aci’s mbulelèlà.”

Mémè ne: “Kwènàku muswè kuMwakidila mpindyewu mene anyì?”

Yèyè ne: “Yèyè neàngangàtè anyì?”

Mémè ne: “Ùdi munkaci mwà kukòòkola ku mwoyi wèbè mpindyewu.”

<sup>184</sup> Nènku ànu mu kazùbu amu, lwà panshi apu, ne twètù kutwà binù kumpàlà kwà bantu batèeleji abu; byamù byà manàyi à mfrangà kwimanabi, dyelangana dyà milawu ya busenji kwimanadi, ne bintu bikwàbò byònsò. Ki mémè kwela byanza byànyì muulu, ne byanza byànyì . . . ne byanza byà minyèngù bikwàtè ne byà luse abi, e kumulombola kùdi Yesù Kilistò. Ncyà bushùwà. Ki cyòci aci, balundà bànyì. Kanùtàngidi . . . Yesù . . .

<sup>185</sup> Cyùkaadi mwenze nànsha ciikàle cinyì, nànsha mpèkaatù yèbè mifiike ya bishi, nànsha nsòmbelu wèbè wa busenji mùshindù kaayi; Nzambi mmwimàne, dilòòlò edi, ùkòòkola ku ciibi cyà mwoyi wèbè, bwà kukufwila luse, nànsha wèwè mwikàle nganyì.

<sup>186</sup> Twinyikàayi mitù yètù katanci kakesè. Mwanèètù wa bakàji, lwàku ku cisanji cyà orgue kwàka, udikù mwà kuswa anyì?

<sup>187</sup> Taatù wa mu Dyulu, kaa, ndi ndòmba bwà Ùcyènzè mpindyewu mene . . . pàdi Nyumà Mwimpè munkaci mwà kukwàta mudimu mu nzùbu emu apa. Twànji kukèba dyàmbedi

Bukalenge, bwà kuKulengeleela, pa dîbà adi ndi ngùitabuuja ne Wèwè neòndope babèèdi. Kàdi mpindyewu mene, Taatù, pàndi nguvmvwa ne kùdi dijinga dinène, dyà ndòndò ne ditwishiibwa apa, bantu bamanyè ne Èkéleeziyà Webè ùdi mu cimwangì, ne twètù tudi batùngùnùke ne kuya batàngile ku Cilumbulwidi. Katùyì bamanyè to kàdi, mu dindà, muntu kampànda ùdi mwà kulwa ku luseke lwà bulààlù, nènku's ki twètù abu balààle, bayè. Pa dîbà edi, mààlabà dilòòlò, bìdi mwà kwikala mu nzùbu wa bitàlù mwaba kampànda, ne misùùkà yètù mu Cyendèlèlè mwàmwa.

<sup>188</sup> Éyì Nzambi wa yààyà, eci cìdi mwà kwikala dîbà dyà ndekeelu's! Eci cìdi mwà kwikala mpùngà wa ndekeelu wikalà muntu mwà kupeta's. Bààbùngì, kakùyì mpatà to, mbasòmbe kaaba aka, balùme ne bakàjì, bàvwà bàjinga, bàvwà bèndè ànu lwendu lwimpè elu, kàdi kacya kabàyi balediibwe cyàkàbìdì nànsha, kabàyi bamanyè cìdi kwikala mùjiibwe ne Nyumà Mwimpè cyùmvwija, nsòmbelu mulàmbula yònsò mu kaabujimà; ne nkànu yònsò ayi, ne cyena-bundù, byumushiibwe kùdìbo, ne Nyumà wa Nzambi ùbàbàtiiza mu luse Lwèndè.

<sup>189</sup> Taatù, Munanga, Kwènàku muswè, dilòòlò edi, mu Dîna dyà Mwànà Webè munanga, Yesù, kusemènà kùdi mwoyi wònsò ne kwakulà ànu mpindyewu anyi? Nènku swàkù bwà bôbò, mu bupwekèlè bwà mwoyi wàbò, bàbàndishèku meeji àbò kùdi Wèwè, bàbàndishè mwoyi wàbò bàmba ne: “Ki mèmè ewu, Yesù. Ngangàtèku mpindyewu, ànu mùndi emu, ne mfwimbèku ne mpèeshèku cintu kampànda cyà cishiilàngàne. Mvwijèku muntu wa mùshindù Wùvwà mufwànyìne kujinga bwà mèmè kwikala awu. Mu nsòmbelu wanyì mujimà, Wèwè wakulù naanyi. Wèwè udi mwakùle naanyi. Udi mutètè bwà kumfikisha ku dyenza bishiilàngàne. Udi mutètè bwà kumvwija mèmè mukumbàne bwà kwenza didìfila adi. Kàdi mpindyewu ditùkù dikaadi diyè bikolè be, Mukalenge, bwànyì mèmè, kàdi nkàadi mudilongòlòle bwà kulwa mpindyewu.” Enzàku nànkù, Taatù. Pàdì luse lùbiikila apa, kumpàlà kwà Cilumbulwidi; cimwangì cyà Èkéleeziyà, cìdi nkushiya Èjiipitù; swàkù bwà bàlwe, ne bàye ne musumbà munène ewu, wà bàdi babiikidiibwe bwà kupàtuka abu. Tudi tulòmba nùnkù mu Dîna Dyèndè.

<sup>190</sup> Nènku patùcìdì ne mitù yètù miinyika, ne mèsù mabwita apa, ne beena Kilistò munkacì mwà kusambila, Ndi ndìkonka ní nudikù mwà kwela ànu cianza muulu cyaanàna, nwamba ne: “Mwanètù Branham, wamvùlukakù. Ndi—ndi ngùitabuuja ne díyì dyònsò dyùdì wamba dìdi Bulelèlè bwà bwalu bwà Yesù Kilistò. Ne tudi tukèngela twètù bònsò bwà kuujiibwa tètè ne Nyumà, ne, ncyèna mwanjì kuujiibwa to, nànsha nànkù. Mèmè ewu's mvwa cidimba cyà èkéleeziya.” Anyì, pàmwàpa kùtu mwánjì kwikalakù to, nànsha kakesè. Pàmwàpa wèwè udi ngènzàmpèkàatù, kacya kùtukù mwánjì kwitaba Kilistò to. Anyì, wèwè udi cidimba cyà èkéleeziyà, kàdi kùyì

mulediibwe cyàkàbidi to. Swàkù wèlè cyanza muulu, wamba ne: “Wamvùlukakù, Mwanèètù Branham, mu disambila dyèbè. Ndi muswè kwikala mwakàne.”

<sup>191</sup> Nzambì àkubènèshè. Nzambì àkubènèshè, ne wèwè, ne wèwè, wèwè, wèwè; ne wèwè, mwanèètù wa balùme; ne wèwè, mwanèètù wa bakàji; ne wèwè, mwanèètù wa balùme; wèwè, wèwè, wèwè, mwanèètù wa balùme, mwanèètù wa bakàji, ndi mukumòna.

<sup>192</sup> Ku dyàbakàji dyànyì eku, mbanganyì lwà kaaba aka? Elà cyanza muulu, wamba ne: “Wamvùlukakù, Mwanèètù Branham, ndi muswè kulediibwa.”

<sup>193</sup> Mpindyewu, vùlukàayi ne, Nyumà Mwímpè ngudi wakula neenù ewu. Mémè mwikàle musadidi wa Nzambì, ndi mumanyè, ànu mudibi bulelèlè ne ndi mwimàne pa cibumbà cyà ku cyambilu eci, ne Nyumà Mwímpè ngudi wakula ne myoyi kaaba aka ewu. Balundà bàànyì, ndi mwà kwikala wa pabwèndè kunùdi, kàdi ncyèna mukoleshi wa maalu to. Ndi cyà bushùwà mumanyè cìndi ngamba aci; mémè mumanyè cidi lutàtù lwèbè mwaba awu, ne cidi disaamà dyèbè aci, ne Nzambì ùdi ùmvwa disambila dyànyì bwèbè wèwè... Ne apa mene mu nzùbu emu mùdi bantu basòmbe bàdi bondòpiibwe, ku kànsèrè, ne bufofo, ne bumpudimaci, ne balèma, ne bikwàbò byònsò, tàngilàayi masangisha à pa buloba bujimà. Kàdi bìshi bwèbè wèwè mpindyewu? Kàdi bìshi bwà bwalu abu mpindyewu? Bu Yèyè mwà kuumvwakù disambila dyànyì bwà cyòci aci, Yèyè kàakumvwaku disambila dyànyì bwà ngiikàdilù wèbè wa musùukà wèbè awu anyi? Bu Yèyè mwà kumbuulwila mwaba ùdi lutàtù lwèbè, Yèyè kàakumbuulwila mpindyewu mwaba ùdi lutàtù lwèbè, wèwè pèèbè anyi?

<sup>194</sup> Mbanganyì bakwàbò bàdi baswè kwela cyanza muulu, kwamba ne: “Mwanèètù Branham wamvùlukakù. Ndi muswè, pa dîbà edi, kulomba Nzambì bwà ikalè nàanyì luse”? Nzambì àkubènèshè, ne wèwè, ne wèwè, wèwè, kàbidi. Kaa, ekèlekèle, ànu mu nzùbu mujimà cyanààna, myaba yònsò's!

<sup>195</sup> Panùcidi ne mitù yènù miinyika apa, ndi ndikonka ne nwènù, bàdi beelè cyanza muulu aba, ikàlaayikù ànu ne ndambù mukwàbò wa ngàsà, nwàmbè ne: “Mukalenge, mvwa ne ngàsà mukumbàne bwà kwela cyanza cyànyì muulu, mpèèshàku ngàsà mukumbàne bwà kwimana kuulu pàdiye ùsambila apa. Bu Yèyè mwà kulwa bwànyì mémè, kumpàla kwà bufùkù kucyàbu, Mukalenge, eci ki cyànyì cimanyinu Kùdi, cyà ne ndi muswè kwikala mwakàne. Ndi muswè kutuutakeena Neebè ditùkù kampànda. Nèngiikale nkùula mwoyi ne nèmfwè muupùkile musààmù. Ngàngàbukà neùmuke ku luseke lwà bulàalu bwànyì; cintu nànsha cimwè kacýàkwikala mwà kwènjiibwa to. Dîbà adi, Nzambì, ikàlèku ne luse pa musùukà wànyì. Piikalà maciima à mashika à lufù ànyùnguluka mu cibambalu amu, swàkù



bwà Māzuwà à kale à mu Siyònà àlwe, kungambula àye naanyi. Nèngiikalè mwà kwimana, Mukalenge. Bidi bìlomba ngàsà wabûngi, kadi Cintu kampànda cidi cinnyungisha. Ndi mwimàne.” Nzambi àkunènèshè, mwanèètù wa balùme.

<sup>196</sup> Muntu mukwàbò neàjuukè, wàmba ne: “Ndi mwimàne, Mukalenge.” Nzambi àkubènèshè, mwanèètù wa balùme. Nzambi àkubènèshè, mwanèètù wa balùme, mwanèètù wa bakàji. Shààla wèwè ànu mwimàne kuulu. Muntu yònsò udi muswè bwà tùmuvùlùkè mu disambila edi, bwà lupàndù lwà musùukà wèbè, udikù mwà kwimana kuulu’s. Nzambi àkubènèshè. Nzambi àkubènèshè, wèwè nsongàalùmè. Nzambi àkubènèshè, mukalenge. Nzambi àkubènèshè, mwanèètù wa balùme. Nzambi àkubènèshè, mwanèètù wa bakàji. Nzambi àkubènèshè, mwanèètù wa bakàji; wèwè, mwanèètù wa balùme.

<sup>197</sup> Muntu mukwàbò ùdi wìmana mpindyewu wàmba ne: “Ki mèmè ewu. Mwanèètù Branham, ncyèna mwimàne kumpàlà kwèbè to, Ndi mwimane kumpàla kwà Nzambi. Cintu kampànda ncingambile bwà mèmè kujuuka, nènku mmèmè ewu mwimàne kuulu.” Udi muswè kucyènza anyi? Juukilà wèwè ànu kuulu cyanààna. Angata wèwè ànu Nzambi búngi ebu. Nzambi àkubènèshè, inábànzà.

<sup>198</sup> Kùdi bakwàbò. Nzambi àkubènèshè, inábànzà. Ncyà bushùwà. Maamù mukwàte ne byà luse awu mwambùle mwanèndè mukesè wa mu dibòko, ùteeta bwà kujuuka kuulu, ne binsonji mu mèsù. Kwéna muswè kulwa anyi? Imàna kuulu cyàkàbìdi. Nzambi àkubènèshè, inábànzà, inábànzà mukùlumpè ùvwa mwimàne kuntu kwàka, ne mukùlumpè wa menemene, mumanyè ne bidi bikèngela bwà kutuutakeenayè ne Nzambi, òmwè dyà ku matùkù àdi panshì aa. Nzambi àkubènèshè. Nganyì udi muswè bwà kwimana mulondèle mpindyewu, àmbe ne: “Nengìmanè”?

Shààla ànu mwimàne kuulu bwà disambila.

<sup>199</sup> Kùdi muntu kampànda mukwàbò anyi? Ndi mùmwè ànu bu ne kùdi muntu kampànda mukwàbò udi muswè bwà kwimana kuulu. Pàmwàpa udi ànu muswè kuseemenaku pabwìpi ndambù. Kùcilààdikijikù kàbìdi to. Juukilà ànu kuulu. Udi muswè kucyènza anyi? Nwènu bàdi baswè kwikala pabwìpi menemene ne Nzambi. Nzambi ànùbènèèshè. Ncyà bushùwà. Muntu kampànda mmufwànyìnekù. . . Nzambi àkubènèshè, inábànzà. Èyowà’s, mukalenge.

<sup>200</sup> Kùdi bantu bakwàbò bóbò bakesè mbàsàtù, ndi mutàngile buludì kùdìbo, bàdi bafwànyine kujuukila kuulu, bwalu Mwanjèlò wa Nzambi nyàwù mwimàne. Nzambi àkubènèshè, inábànzà. Ncyà bushùwà. Mpindyewu, èyo, mwanèètù wa balùme, kàdi bìshi bwà bwalu abu? Èyo. Nènku, Mwanjèlò wa Mukalenge mmwimàne, ndi mumanyè. Ndi nCimòna, ne ndi mumanyè ne bivwa bikèngela bwà muntu kampànda kujuukayè

mpindyewu mene. Nêngǎnjì kwindila bwà katancì kakesè. Nzambì àswekù. . . Wèwè's udi mumanyè ne Yèyè ùdi munkaci mwà kusàka mwoyi wèbè awu. Mmwimàne mwaba awu, wèwè mulunda wanyì. Yèyè ngudi munkaci mwà kukwambila bwà wèwè kwimana kuulu awu. Kwènàku muswè kucyènza anyi? Juukilà wèwè ànu kuulu ùMwitàbè, ànu mpindyewu ewu. Èyo.

<sup>201</sup> Udi mutwishiiibwe mpindyewu anyi? Bu Nzambì mwà kukubiikila dilòòlò edi, mu disangisha edi; diyiisha edi, dibiiikila edi, nedikatwilàngànè neebè mwàmwa paùdi ufwà. Cyùdi mwenzè pa bwalu abu ncinyi? Wèwè kùyi mutwishiiibwe to, cyà bushùwà, juukà mpindyewu, bwà Yèyè wàmòna ne wèwè udi muswè kwitaba, bwà kwendela mu Bukènkè.

<sup>202</sup> Mpindyewu, Taatù wetù wa mu Dyulu wa musàngeelu ewu, bàna Bèèbè bananga aba, myoyi mitekètàngane, Dìyì ndimatè munda mwà mwoyi wabò dilòòlò edi. “Diitabuuja didi difùma ku dyumvwa, ne dyumvwa dyà Dìyì.” Ne Wèwè uwwa mwà kuumvwa. Ne Wèwè wàtekèshì myoyi yàbò, bààbúngì mbòbò aba biimàne kuulu, balùme ne bakàjì, nsongàalùmè ne nsongàakàjì, bàdi bàKujikula Wèwè bu Musùngidì wabò sungasunga ne Mulombodi.

<sup>203</sup> Nènku swàkù bwà Mwanjèlò wa Nzambì, Udi kaaba aka mpindyewu dilòòlò edi awu, swàkù bwà Yèyè àbàlombòlè mu nsòmbelu mujimà. Swàkù bwà bàlombodiibwè ku Kàlvariyo mpindyewu mene, mu myoyi yàbò, ne biitabè Yesù bu Musùngidì wabò. Nènku swàkù bwà Nyumà Mwímpè, ku Mashi à Kilistò, àpwekelè pa misùukà yàbò, ne ùmushèku dibènga kucyùkà dyà maalu dyònsò, ne bújèku ne dibàtiiza dyà Nyumà Mwímpè. Swàkù bwà edi diikalè dilòòlò dyà ditàmbe bunène dyà mu nsòmbelu wabò. Tudi bamanyè ne ndyòdi, bwalu dilòòlò edi bàdi munkaci mwà kuKwakidila. Enzàku nàнку, Mukalenge, mpindyewu mene. Nènku swàkù bwà bàye kumbèlu kuumukila apa, dilòòlò edi, ne disànka ne dicyònkòmoka, bènda bàtùmbisha Nzambì, ne mwoyi wabò wònsò. Ndi ndòmba dibènesha edi mu Dìna dyà Kilistò Yesù.

Mpindyewu Mukalenge ànùbènèshèku panùdi nusòmba apa.

<sup>204</sup> Swàyikù nnukonkèku mpindyewu, muntu ne muntu wa kunùdi uvwa mwiimàne kuulu awu, ne udi mumanyè ne cintu kampànda ncikwenzèkèle paùvwa mwiimàne kuulu apu, elà cyanza muulu. Elà ànu cyanza muulu cyaààna, wèwè ùdi mumanyè ne cintu kampànda ncyenzèke. Nzambì àkubènèshè. Nzambì àkubènèshè. Ncyà bushùwà. Bidi ne cyà kwikale nàнку, nwènù balunda bàànyì. Bidi ne cyà kwikale nàнку. Mvwa mwimàne, mumòne kaaba aka ànu mpindyewu, Mwanjèlò umweumwe mwena bwalu búmvwà ngàmba awu, wènda ùtàm bakana mu nzùbu emu; Mwanjèlò umweumwe wa Mukalenge awu, Dikunji dyà Kapyà adi. Mvwa munkaci mwà kuyiisha tusunsa tùtaanu anyi dikumi tushààle etu,

mwinshì mwà disonsodiibwa adi. Ndi muMumvwe, muMumòne ànu wènda Utentemuka mu nzùbu emu. Mpindyewu, nudi bafwànyìne kwela meeji ne ndi munkaci mwà kunwèlela myanu, kàdi m'Bulelèlà.

<sup>205</sup> Mpindyewu, ncyèna ngèèla meeji ne nêmbiikilè nànsha mulongo wà babèèdi to. Ndi ngèèla meeji ne nêngiimanè ànu kaaba aka mene ne ndombèku Nzambì bwà kushindika ne Ndi munwàmbile Bulelèlà, aci's ncyà bushùwà, ne bimanyinu, maalu à kukèma.

<sup>206</sup> Mbanganyì mwab'ewu bàdi baswè kwondopiibwa, babèèdi? Elàayi byanza byènù muulu, mwaba kanà wònsò wunùdi awu. Ela ànu cyaña cyèbè muulu cyañààna, wamba ne: "Ndi nciitaba." Eyo.

<sup>207</sup> Ndi muswè bwà nwènù kutàngila, kwikala ne mwoyi, ne kwitabuuja. Muntu kampànda mu batèeleji emu, lwà *apa nùnkù*, muntu kampànda lwà apa nùnkù, tàngilà ànu cyañààna, wàmbè ne: "Mukalenge Yesù. . ."

<sup>208</sup> Mùshindù ewu. Ndi ngiitabuuja, cìvwa cinsàke bwà mèmè kwenza dibiikila dyà ku cyoshelu adi dyàmbedi, tudi ne cyà kupeta luse kùdiYe. Eci ncintu cipyacipyà kùndi. Ndi ne cyà kupeta luse kùdiYe, dyàmbedi. Dìbà adi mèmè mupetè luse, ne mwenzè bilenga. . . Ne nwènù, dikumi ne babidi, anyi makumi àbidi ne bànaayi, misùukà milwè kùdiYe ànu dìbà adi mene. Cyà bushùwà, cyà bushùwà. . .

<sup>209</sup> Mpindyewu nwènù, muntu ne muntu wa kunùdi nwènù bàdi bàlwa kùdi Kilstò abu, dìbà adi, nùpetèku èkèleeziyà mwimpè muujìbwe tètè ne Nyumà Mwimpè ne nùyemù. Ne mwòmò amu nùkebàyi dibàtiiza Dyèndè too ne panwàDìpeta; ndàayi ànu kuya, ànu dilòòlò dyònsò, ditùkù dyònsò, tùngunukàayi ànu ne kusambila. Nènku dìbà dinùdi nutàngila. . .

<sup>210</sup> Mpindyewu kùdi nwènù bàdi bàsaamà, mèmè munwàmbile Bulelèlà, Nzambì neàjaadikè ne m'Bulelèlà. Ncyà bushùwà. Ke umwèpelè udi mwà kucyèna. Nènku Nzambì neàcìmanyishè, bu wèwè ànu mwà kusambila ne kwitabuuja ne mwoyi wèbè wònsò. Tàngilàayi ànu cyañààna, ne nwambà nùnkù. . .

<sup>211</sup> Pàakatwilanganà naanyi Mwanjèlò wa Mukalenge kuntu kwàka ku Green's Mill, mu Indiana, kùkaadi bidimu mwandamukùlù, paanyimà pàà mwikale kacya ku bwànà bwànyì, wènda ùndonda, ùleeja bikèènà-kumòna, pangàakayà kùdiYe, Yèyè kwamba ne: "Wèwè mwikale ne meeji matòòke, mufikishe bantu ku dikwitabuuja, cintu nànsha cimwè kacyakukàndamana kumpàla kwà disambila to."

<sup>212</sup> Mpindyewu, Yèyè mmufwànyìne kukwenzela cintu cimwècimwè aci mpindyewu cìvwàYe mufwànyìne kwenza dìbà adi aci. Yèyè mmubiike ku bafwè. Ne Yèyè. . .mwaba awu batèeleji kumpàla Kwèndè. Yèyè mmumanyè cidi pa yònsò wa kunùdi, cinùdi benzè, cidi lutàtù lwènù, cyònsò cidi cicitàngila.

Nudi nwitabuuja nàнку anyi? [Disangisha didi dyamba ne: “Amen.”—Muf.] Nàнку cìtabùùjè ne mwoyi wèbè wònsò.

213 Ndi mmòna nsongààlùmè musòmbe kaaba aka, mwikàle wìtabuuja, mwikàle ùteeta bwà kwitabuuja, mwikàle ne diitabuuja. Udi wìtabuuja ne Nzambi neàndekèlè mmanyè cidi cìkutàcisha anyi? Udi wìtabuuja anyi? Bu Yéyè mwà kwenza nàнку, newitabe dyondopiibwa dyèbè anyi? Wèwè udi ne disaamà dyà mwoyi. Kì ncyà bushùwà anyi? Amba tũng bu mèmè mwà kukwambila mpindyewu ne uvwa mwondòpiibwa ku dyòdi adi? Udi mwà kuciitabuuja anyi? Imànà kuulu ànu bwà katanci. Udi ne mwoyi ùlubakana, ne lupeepà ku mwoyi. Mbikutàcìshe kùkaadi ndambù wa matùkù. Musangu ùmwèpelè. . . Dìbà dyùdi ulàla panshi, kàbìdi, ùdi ùditùùjakù, ne udi ne dituuta dyàbùngì ditwa paanyimà ne kumpàlà, wenda ulubakana. Ncyà bushùwà anyi? Bwalu, cidi citwàdila cifù cyèbè mpàcì, bibànda too ne mu mijilu. Kì mmwòmò anyi? Kwàkutàcìshìibwà kàbìdi kùdi cyòci aci to. Lamà ànu cyùdi naaci mpindyewu mene aci; udi mwà kwalukila kumbèlu ne kuumvwa bìmpè.

214 Ncyèna munkaci mwà kubala mu meeji èbè to. Ndi mwenyi ànu wa menemene ewu kùdi. Wèwè udi ànu muntu musòmbe mwaba awu. Ncyà bushùwà anyi? Kacya ncìtu mwànji kukomònakù to kacya bándela, ne ncìtukù mumanýè kantu nànsha kàmwè pa bìdi bikutàngila. Aci ncìlelèlè anyi? Itàbùùja ne Mukalenge ùdi kaaba aka!

215 Bwà kwamba menemene, wèwè nsongààlùmè, ndi muswè kukukonkaku cintu kampànda, nènku wèwè nèumona ne eci mbulelèlè anyi kì mbulelèlè. Kwènji ànu katanci kakesè cyanààna, dyàkàmwè, cintu kampànda cyà pabwàcì kulwacì pambidi pèebè pàngaàbangi kwakula bwà “kalonda kupàtukakù mu mwena kalonda.” Kacìvwa cyòci anyi? Kacìvwa njiyà yà pabwàyi yùvwà mupetè, paùvwà musòmbe mwaba awu anyi? Kì mmwòmò anyi? Ne wèwè kwènà muntàngile mu cikondo cimwècimwè aci, ne mèsù anyi kutwilanganawù neebè pa dìbà òmwèdimwè adi anyi? Ke dìbà dyùvwà mwondòpiibwe adi’s, ku disaamà dyà mwoyi, ànu mwaba awu mene. Amen. Aci mmwòmò menemene. Yèyè ùdi kaaba aka.

216 Ncyèna munkaci mwà kubala mu meeji ènù to, nwènu balunda bàànyì. Ndi ngàmbe ànu Bulelèlè cyanààna, ne Nzambi ùdi ùcìshindika ne m’Bulelèlè.

217 Udi wela meeji bìshi bwà bwalu abu, wèwè ùdi musòmbe mwaba awu ku luseke lwèndè aku? Udi wìtabuuja anyi? Udi wìtabuuja ne mèmè ndi mupròfetà wa Nzambi anyi? Udi wìtabuuja bu Nzambi. . . Wèwè udi musòmbe kumpàla eku, pa nkwasà wa kumpàla apa, ki bwà cinyi ndi ngàakula neebè bikolè, Nyumà mmwalùkile paanyimà pàapa, munyùngùlùkile. Kàdi udi wìtabuuja ne, bu mèmè mwà kulenga nyumà webè, Nzambi neàbuulule cidi kaciyi cyènda bìmpè anyi? Udi mufwànyine

kwitaba dyondopiibwa dyèbè anyi? Wèwè udi ne disaamà dyà nsùkaadi. Ncyà bushùwà anyi? Elà cianza cyèbè muulu ní mbulelèlà. Juukilà kuulu. Udi witabuuja dyondopiibwa dyèbè mpindyewu anyi? Mukalenge Yesù Kilistò àkusàngàjèku yònsò mu kaabujimà. Nzambì àkubènèshè.

218 Ikala ne diitabuuja. Muntu kampànda *muneemu* itabuuje. Ikàlà ne diitabuuja, ne mwoyi webè wònsò.

219 Ndi mmòna nsongààlùmè musòmbè mwaba awu muvwàle nkooici wa bleu. Kì Cyòci aci ciimàne kumutù kwèndè mene aku. Wèwè udi ne disaamà dyà pa dikòbà, kì mmwòmò anyi, wèwè nsongààlùmè? Kì ncyà bushùwà anyi? Juukilà kuulu. Kaa, ndi mmòna ne, wèwè udi mwende ne musùmbà ewu. Ncyà bushùwà anyi? Èè, udi muswe kwalukila kumbèlu musàngàle anyi? Elà cianza cyèbè muulu wàmbè ne: “Mukalenge Yesù, ndi ngiitabuuja mpindyewu ne Mwanjèlò wa Mukalenge ngudi ulombola. Ne ndi ngiitabuuja ne ndi mwondopiibwe.”

220 Udi wela meeji bìshi bwà bwalu abu, muntu udi mumulondèle wàwa, udi witabuuja, wèwè pèèbè anyi? Juukilà kuulu bwà katanci kakesè, bwà mmonè mwà kukutàngila. Udi witabuuja ne mèmè ndi musadidi wa Nzambì anyi; ne mwoyi wèbè wònsò? Udi muswè kwondopiibwa ku disaamà dyà mwoyi adi anyi? Kì cyùvwà naaci ncyòci aci, kì mmwòmò anyi? Aci's ke “*cyùvwà naaci*,” mündi mwambè. Kwèna naaci mpindyewu to. Udi mwà kwalukila kwèbè kumbèlu, wèwè pèèbè.

221 Muntu udi mumulondeèle awu, udi wela meeji kaayi bwà bwalu abu, mukalenge? Udi witabuuja ne mwoyi wèbè wònsò anyi? Udi witabuuja ne mèmè ndi mupròfetà wa Nzambì anyi? Juukilà kuulu. Udi witabuuja ne mwoyi wèbè wònsò mpindyewu anyi? Uvwa ne dibìnduluka. Kì mmwòmò anyi? Nwamònu anyi? Ncyà bushùwà anyi? Elà cianza cyèbè muulu. Udi mwà kwalukila kumbèlu musàngàle mpindyewu. Yesù Kilistò ùdi ùkusàngaja.

222 Kàdi bìshi bwà muntu udi ulonda awu, juukilà kuulu, kwìnshì kwà mulongo, udi witabuuja ne mwoyi wèbè wònsò anyi? Juukilà kuulu. Udi witabuuja ne mèmè ndi mupròfetà wa Nzambì, ne ndi musadidi Wendè anyi? Udi witabuuja ne Yèyè mmufwànyine kungambila cìdì cikutàcisha, ne udi mufwànyine kwitaba dyondopiibwa dyèbè anyi? Cìdì pa muminu wèbè apu. Mmwòmò anyi? Alùkilaaku kwèbè kumbèlu ùsangalè, mu Dìnà dyà Yesù Kilistò.

223 Muntu mukwàbò kanà yònsò mu nzùbu emu, udi muswè kusàngajiibwa awu, ùdi mwà kujuuka ne kusàngala. Panwikalà bangiitabùùje, mèmè bu musadidi wa Nzambì, juukilaayi kuulu. Nzambì àkubènèshè. Disaamà dyà bânà bakàji, kànsèrè, ki dyòdi diyaaà dyàdya. Nzambì àbènèshiibwè! Muntu ne muntu wa kunùdi, elàayi byanza byènu muulu kùdi Nzambì.

<sup>224</sup> Taatù wetù wa mu Dyulu, ndi mpindyewu mpiisha disaamà dyònsò didi mu nzùbu emu, ngiipata nyumà mubì yònsò, ne swákù bwà Nyumà Mwímpè àkòòkeshèku mpindyewu ne àsangajè muntu yònsò.

<sup>225</sup> Tentèkèlàngànàayi byanza muntu ne mukwèndè, ne nwămbè ne: “Mukalenge àtumbè,” myaba yònsò. Ne sàngalàayi ne sànkayì, bwalu Yesù Kilstò ùdi kaaba aka, Mwànà wa mùkòòkò wà Nzambì, bwà kunùsàngàja, muntu ne muntu. 🐦

54-0329 Bupikudi Ku Bukolè  
Church Of The Open Door  
Louisville, Kentucky États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)